

清容居士集

冊六



清容居士集卷第三十一

元 袁 桷 撰

墓誌銘 塔銘附

周夫人墓誌銘

夫人諱天福朝議大夫知瑞州周公諱應合之女朝議大夫直寶章閣廣東經略安撫知廣州冷公諱應激之婦今湘陰尹名頤孫之配世爲龍興武寧人瑞州以學行表後進論議惜許可湘陰拔童子科整敏善自晦亟愛重之故俾夫人以歸兩家爲儒宗婦壻各得所擇衆咸曰在是夫人幼靜慧受女史工正書二弟始就學日諷誦感發相勵事尊順謹媿德儷義能使外有不知絜豆籩洽昭穆靡密斟度恩意各盡夫宗宜焉二子曰有泰有益保抱具訓輒置筆札毋誑戲稍長約繩墨躬詰難嘗言吾誘弟以婉督汝以嚴皆一轍也善宜亟稱過不可得聞書種寧有斷乎年四十有九以卒是歲大德癸卯葬仁義鄉下舍里女六長許嫁周志行孫男三女二仲弟分宜丞天鳳來京師桷與之游議門戶

與植婦道允賴數稱夫人之賢過時而彌哀於是有泰實來致湘陰之命銘曰
有崇義閭維周之敷展世秉文耳受口濡執彼閭儀來彝來祗宗承其和家安
其慈誦聲在戶嘉醕在廡叶于夫君婉德以輔雙桐高岡附萼煌煌擢榮舒英
穀旦用光冽彼寒泉聿環墓田昭銘新宮實曼厥延

方夫人墓誌銘

潮廣儒學副提舉上饒劉君安德恭甫之夫人方氏大德庚子五月己未卒卜
祔先墓不吉乃假葬于舍東越八年相中堂山北以吉告於是其子光以事狀
來京師謁陳郡袁桷銘夫人世居饒之德興幼特靜好其父隱君常抱膝上祝
曰吾家世儒林當爲汝慎擇婚對方是時上饒劉君某以太學名輩待次寧國
教授歸授徒山中饒信地接武習進士業者率相戒師劉君始出鄉隱君慨曰
捨劉氏子奚適卽德恭甫也未幾寧國死德恭甫刻意振擢不以貧窶自憐隱
君念夫人憫德恭不自置察夫人意色無吝悒卒俾以歸德恭甫壯歲力問學
預計偕生理靡密一不問夫人銖黍化治手靡而身理之者寒暑曲備方丙子

兵變時德恭甫傾家貲以完護爲急夫人力贊之事定勉夫以仕且言曰盍亦少慰吾父意始伯姊嫁同里蔡氏蔡姊家侈盛脫簪珥以服亟搖手弗受自是終老無異飾生男子曰升老幼卒德恭甫晚得光時夫人躬訓育抱呬慈嚴酌宜迄見光克紹其父業焉始光游京師與余交相久話言母儀悲泣不已余特以爲母子至情不足異夫賢其媿子孝其母閭里知事者率能是及觀夫人之行與光終身之哀見焉若將弗及則帷閣衽席色笑敦厚制事以理夫豈勉而然哉噫是宜銘夫人諱柔則曾祖瑋祖應奎隱君諱逢吉卒時年六十有三子光瓊州教授今爲中書屬從事孫男二至大二二年將治葬德恭甫亦卽世於是

以某月某日附銘曰

詩始房中維教之基朶昔薄言和平以孳考視劉媛温恭具儀膏沐以韜絲枲是師外防內完拮据孔艱孩無矯慈諸御閒閒匪異其誠由衷允安與言遺思載汎載瀾女史曰微德音莫跂瞻彼墓田有頽斯泚松岡豐融不震不圯廣揚

嘉芬式裕爾嗣

盧母王夫人墓誌銘

盧氏河北望族有諱仙者家深州武強縣金將亡武強爲秦趙要衝歲蹂兵不息由是徙家睢州兵浸南家益蕩析有子曰全掠爲奴于時全生子曰榮甫十歲審其父北行斷髮仰誓呼曰兒不獲見父寧卽死行泣道中呼其父姓名道由真定日號訴宛轉事益著里人憫之問所掠主無異辭卒義以歸父子復居武強稍長學書算入鄉校試吏爲縣從事時錄事王君崇攝武強審盧氏子孝感且吏能乃曰吾女舍盧氏曷取配遂以歸生子四曰文曰仁叔曰廷信季曰德廷信生始三年不幸盧君卒夫人撫其四子力治桑泉甘苦淡垣屋庫狹內外整截有限程督訓導過者無敢譁事其舅姑以壽終至元十三年詔考郡縣孝節於是河北道提刑按察司審盧婦事不誣州達于禮部復除其家而廷信始仕江南調泉州晉江尉辟福建行省掾又掾江西敘遷爲鄞縣丞復掾江浙未幾以才佐海道漕府陳不便事就領金符爲温台千戶歲運粟視往歲數三倍而夫人皆見之廷信爲鄞丞余時里居見其處事精覈剔植蠹利官長不能

出私語上府陳白伉直無隱嘗曰吾盧氏世爲吏刻峭文致非以起宗吾父有
孝行迄不得上壽稍自飭勵繫吾母之訓戒子孫爲儒冀吾母慰意焉至大二
年夫人卒年八十有六祔葬于先塋延祐二年天子孝治天下推賚存歿而廷
信秩五品得贈其考奉議大夫真定路趙州知州驍騎衛尉柏鄉縣子夫人亦
追封柏鄉縣君四年遣其子某來京師請銘楨待罪史館若盧氏事誠宜書今
誌也無溢辭系以銘曰

林林生民男室女家禮失俗淪企而祿奢維貞丈人尙古不遐卓彼孝童木升
斯華承筐來嬪絕其榮夸四雛在戶蓬首苦心甕牖屹城過者肅襟宅里表植
柳槐森森頰弁奮揚滑甘具新大耋莫嗟淑德岑嶽戒而孫子服儒以嗣教經
展世厥武踵起有隆墓田大賚告祉式時芬苾永保千祀

侯母王夫人墓誌銘

世祖皇帝以仁立國敦節申義丕變醇厚至元八年時則有若太保劉文貞公
議事省中增益今式由是郡縣旌表綽楔槐柳光于往史猗歟休哉楨由集賢

歸里居錄事判官侯玉踵門來言曰聞子嘗執筆太史節婦孝子歲終必登于史籍玉也敢有言玉故居濮州鄆城縣其先女直人曾祖敬嘗爲金殿前將軍祖林金人匠總管父珪仕皇元爲濮州儒學教授濮州不幸年四十有一以卒母王氏生子女六人惇然未勝喪吾母之教四子也皆身訓之其鞠二女也必教以纂組化治嫁聚耕稼能謹之以時家貧無生產而充然若有餘者繫吾母之力也玉兄弟旣長而吾母益能綜核靡密不知有缺怠故仕者得盡心於官政而不仕者孝謹稱里閭玉之爲婺州永康縣巡檢時至大三年也母年七十有七以卒至是婺居凡四十有餘年矣後復爲婺之平準庫副使婺之人知吾母行若是縣儒士具實言於縣縣下於鄉加察考焉由是以達于郡郡復移於所居州州明於禮部然後悉如詔旨旌于其鄉敢以是有請傳永遠嗚呼劉向作列女傳當熙明之時則肅雍平和藹然有關雎士女之行至於末季則不幸不得全其生讀其書未嘗不興歎也孝慈耕桑帝堯表閭夫人生承平貧能以禮防少老一節實聖天子休養生息漸仁秉德有自來矣盛矣哉能勿書乎夫

人名妙善父某妣某氏長子伯巖敕授定海慈溪兩縣舡官次某不仕幼卽玉也女嫁某氏銘曰

勵其躬訖于逢慈儉勤壽考終表華楹帝堯功過者式報燉豐

劉夫人墓誌銘

婦人之事舅姑有從其令者矣若近矣莫知其心焉有屈體承色先事以備逆志以求其得謂之孝與或曰是知及之考其中有疑焉今之爲舅姑嚴重則生畏畏不能以洽玩弛則生怠怠近於瀆閨門之訓厲以失之而容忍者於教乎何有在易之象曰家人嗃嗃婦子嘻嘻吾於郝君鹽使從之之夫人有取焉夫人姓劉氏河間人父諱鼎母牛氏夫人之姑李嘗祝香以告曰願吾子孫生悉如劉婦噫此非出於令與知也孝根於心怨咎莫知旻天中野且悲且懼若婦人貞靜其誠慤顯著一語以盡茲其爲孝也大矣夫人事夫之寡叔母夫之孤姪有恩愛鹽使病未疾歲久不愈斥竭簪珥佐醫藥教子志善能植立兩見爲

名某御史至治二年某月某日卒年七十有二明年二月某日祔葬于西山之

祖墓楠往銘鹽使君矣今御史復請銘夫人諛溢辭事史官所丁大丁不

出閩戶以孝養為飭躬本考其姑嫜之言是宜書銘曰

有言閩閩有儀珊珊視其寒温靡覲愠顏從姑玄宅弗愧以懌繫爾後人以永

作則

韓夫人墓誌銘

中原韓有二族居會稽者為安陽居廣信者為潁川龍圖閣學士無咎公師表
一世其子仲止克紹家學摺紳號二韓父子而廣信別出一族曰侍郎公祥字
履善常卿公補字復善嘉熙中士類稱為二韓兄弟楠族祖正肅公持節江東
辟入幕府在後省復薦為國子官人皆曰正肅善選士二韓公聞望駸駸與潁
川相並盛矣哉天運合一衣冠家漸滅幾盡江浙閩蜀大略相近余歸老里閩
有儒生踵門以告曰容徐氏子祖母韓夫人無為大夫諱裡之女大夫二韓公
之親弟也自夫人歸徐門克持其家事姑以孝著待夫之弟妹助裝以有室家
其相夫也卻金以成美夫官建寧僚屬有不孝其母者夫人引喻廣譬能使其

妻訖事姑以禮訓子舉前史言行時刻畫故事人物以佐警戒故其子孫俱能守家教容又言曰徐故廣信大家刑部侍郎諱元杰實容從曾祖楠聞侍郎公侍講筵于時史丞相圖起復百僚皆進疏理宗猶豫不決侍郎獨微言曰邊事漸寧從戎以墨纒失國體丞相誠經濟老其才以用未晚也丞相聞是語憮然曰嵩之不得起復矣夫人之舅諱卿子朝奉郎權知嘉興府事其夫諱忠甫終廣德建平尉夫人之曾祖大寧奉議郎知徽州婺源縣妣諸葛氏贈宜人祖貴玉贈朝請大夫妣端明汪公逵之孫女男一拱辰將仕郎信州路永豐縣主簿先八年卒女一順正適祝士貴孫男五宜容宅安竇孫女四卒以至治二年享年八十以泰定二年某月某日葬于某山容不遠千里來謁銘秀整足以興植使世家皆若是其曷有憂乃爲銘曰

亭亭兩家尤爲舊門服習懿德克紹厥聞幼工女史粲其纂紉亦游於藝靡不究勤母曰旣盲舐膜還明來嬪于徐事姑益精奉脆擇甘順其性情不侈其長不夸其盈訓子督孫雅言諄諄厖眉秀姿儼兮淳真宦族日圯內教莫陳吁嗟

夫人表茲堅珉

定水源禪師塔銘

大雄氏以己說剖三宗禪學汪洋廣博言意承接絕去文字稍契入輒證爲知
道小智大黠相煽以自高律教廢棄食不知耕居不知工恣情於無畔岸而道
益以昧唯妙源師獨憂之自嘉定十七年受具戒卽游方明本心久而曰不耐
塵勞心曷以制願習賤事以調御寓本州天寧寺歲大饑赤足踵門以化後始
歷清職曰吾得無媿名教矣其師愚公持正議不冝下宰相吳潛潛怒繫獄辱
之退居精舍獨侍側辨難卒有疑義愚公啓機以示曰汝今太平矣愚公住徑
山卽俛首率僧衆愚己老學子林立寮下析微統宗愚喜力贊之主平江薦巖
內外事不一廢舉鼓山國清辭不就主泉州水陸院治若薦巖而俗士益信慕
愀然曰吾寧久是攜錫以歸桷先曾大父太師樞密越公功德院曰定水伯父
賓州先府君處州議曰寺缺主者善趨謁迎奉吾兄弟不受能以寂照解脫爲
義則庶幾冥福源公行堅望高使力請必不讓以素所往來者通意乃欣然以

來桷時年十三或問曰吾儒性善與佛所言同否曰同感物而動漢儒失之由是有不同焉後乃曰儒釋二教分別有異在治人治心治人在五常治心在四大脩五常治人之本脩四大亂心之本道微世衰誠得一人焉不可得涕淚交下謂桷曰祿損則福益蓋慎諸布衣鐵衲終日尸坐語徹機迅奔電絕壑不可制伏稍斂戢則瞬息在几席禪人仰之四方士尤宗之精於詩故宋名士喜之然不冑表褻舊築居於越之雲頂將終願解定水以歸且命無建塔無火化以任其壞其徒不忍卒埋是山以至元十八年卒壽七十有五俗居象山縣姓陳氏爲僧五十有九年銘曰

道弊於文扈言以宣由簡速超悟者日繁空浮變騰若火燎天服奇食珍謂合自然師實已憂榮戚靡覩或逃于谷或伏于莽唯大雅是遵唯古德是祖機以峻傳言以戒輔通黜興廢道曷敢替幽局潛珍戶屢屬係彼昧其承卒黯以逝昭銘授徒勿圯勿翳

延慶入法師塔銘

四明法智大師以天台教旨經緯導達學者謂爲中興南湖實講貫舊址踵主其席稍不厭衆議訾病交集歷代承接皆有足稱道至師居南湖千口無異辭師名善入傳姓世居定海大蓬因法師見異之淳祐十一年與半山彬師俾受具戒游諸方辨解究詣客東掖山著教家四書據會執約不以文字溺泥指畫勤懇從者樂其易簡初佛光法師居上竺提其徒悉使出門下于時有善良師與師相講習各植立不冑和附師與良議曰吾師大蓬兄能嗣之願再拜以嗣良後嗣圓覺頑空師而師卒能昌大蓬始典謁南湖後首教坐主赭山東皋世忠其說以角立爲大病支離爲末流泛不溢詞約不厓絕禪人土子咸傾仰之興仆復侵安衆靡懈泉南僧素宗禪學慕師德重趼以請法智之學行於東南六十餘州至是入海嶠人益奇之至大年中詔宣政行院慎採選勿阿意貪倖集議者曰南湖缺席捨師孰能遂以昔日所傳授者深省密啓空假破建一性明靜而互議交毀訖忘于言大蓬果有聞於世崇本誓志師於是有成焉其凡見於脩植施於人事今不復著錫號惠觀弘教法師而自號曰秋虛延祐年

五月二十有六日示寂爲僧六十三期年七十有八化于城南頂骨得舍利葬法智祖廷而以爪髮歸東臬冢間之精舍至元間楠納交于東臬叻若不能言聆其坐講則汪洋罔詰秉行潔清癯容儼脩粹然古德有足興起弟子大倫正道等來乞銘乃爲之銘曰

四明之興匪事於言橐籥萬殊貫于心源如水必東如矢必鵠末世濫觴語益以瀆佔畢究鋪千緒億條炎炎詹詹泛焉以寥師慨有憂約陳其辭探微發機會歸一岐承宗紹傳不希其逢謝彼翕訾矢心圖終後歸南湖振揭初說曰吾師有傳茲道不滅弗蔓其根弗瑕其璞癯然蕭閒廓以恬泊世教日淪躡雲徂高著爾懿德我銘用昭

天童日禪師塔銘

紹定辛卯蜀破士大夫蔽江東下成都大慈寺主華嚴教僧之秀朗率棄舊業以教外傳游東南若癡絕冲無準範導達後進表表名世者皆其門人而範之成就益衆天童師其一也師諱淨日號東巖俗居南康之都昌姓廖氏幼歲喜

誦佛書解大義常食蔬果以自持年十五告父母願爲浮屠氏明年祝髮于廬山香林訪道仰山石霜遂入浙見沖師於靈隱越二夏不契乃登徑山見無準師範大許之語在傳道錄後見西巖惠于天童惠無準師大弟子其提示與無準無異危機敏鋒迎拒莫覩風止水息渙然帖順遂密契其旨卒服從之俾守藏室後開先無文璨屈爲第一璨亦僧之俊傑由是譽聞益彰宋景定某年江東帥汪公立信慎許可推以主圓通咸淳某年江東漕使錢真孫俾兼領東林至元壬辰主育王三年歸隱雪竇大德四年集公議主天童師之行峻絜以完語溫氣和衆益得以親納其徒俾明徹復性不侈于言解其蔓惑處於世若無所施爲遐邇嚮慕傑閣銅象無踵以至而於天童功最著久居東林化俗警衆民爭繪以祝故其與天童廬山之民奉貲以助尤夥生宋嘉定十四年辛巳終至大元年戊申年八十有八僧臘七十有一將示寂戒其徒書韻語以示曰天爲蓋兮地爲函吾奚爲乎塔與庵灰吾骨兮山阿言已矢兮勿鑿越二日沐浴端坐而逝其徒奉遺言以化齒根不壞遂斂藏于西巖之清風塢噫耆舊日淪

爭懃恣蕩甚於世人理不勝欲靡然頽瀾莫有障窒觀師景行實泚其頽今弟子在浙東西江東西若干人蠻溪嶺嶠承師之教亦不可勝紀如砥等來請銘

銘曰
七情盪摩約性返源喻以攝持匪夸浮繁末俗濫觴競立險艱眩一駭百莫執其凡性本湛虛分別則二不以解通不以思擬寂非有存感乃隨義達摩之功空其所空奚後人騁馳庸失玄宗空不假爲茲惟用中蜀學簡易師承其風開盲振瘖發機以示云彼摩尼非淨非穢往安自然是謂止止鮪背長身從者如水丹霞嵌空匪耀凡目曰茲山之頽否極斯復敬者效輪罔不率服山君來朝雲醜霧轟幻身旣空勿錘勿甃一氣孔周窮彼變易清風之塢石列五色恍焉如存嗣者是式

廣恩仁法師塔銘

師名可仁貫天台縣寧海姓胡氏號木庵幼歲游四明山居資福寺習天台鈔疏于時我曾大父樞密越公治齊國楊夫人喪見師秀整儼恪俾以從服闋吾

必以汝祝髮資楊夫人福越公以右司郎中歸召爲軍器少監尹臨安樞密之
夫人周國陳氏曰師宜祝髮矣嘉定十三年設齋上竺乃得度于時月大師以
講論訓諸徒願侍席側大師與越公厚善謂師曰今僧徒聰敏林立稍使一人
預人間事得無害統體乎由是在郡治間歸胡舉展治林嶂一以任師在館中
參政應公儻猶未仕深器之曰使師不爲僧其問學當與士子並中書舍人陳
公耆卿時爲臨安教授與師同里亦曰應公言然越公入政府例得經院乃相
攸紫巖繩約四履峻危有階引泉有梯淬醯除險帖石助高審面曲直周折獻
秀紹定肇工淳祐告成屈以主席錫名曰廣恩崇福伯祖吉州大父尙書咸諉
以事罔有弛缺往侍諸父時見師承接曲盡而恃氣凌鑠者不敢出慢語至於
桷四世矣噫逮今五傳有不善扶植者矣而師亦四傳守規蹈矩僅一二數兩
家相視岌乎可懼桷由翰苑歸登塔亭謂塔主子鎮曰往事將湮沒師之行業
不可不紀其徒曰是在太史師以至元十七年某月某日入寂僧臘六十一度
弟子二十有 人有詩集若干卷大澤大雅相繼主是寺凡四十年規約散弛

今有子堂子鑑子鎮子金子真猶能知師遺事下是不復解其寧有不哀也夫
銘曰

維大雄氏內寂外脩不偏一能用彰以周在師敏通卒異其儔峨峨新宮百礎
承宇以其彌縫莫或敢侮智周行圓耆年以輔成之匪艱承之孔難大訓厥徒
黜慙矜頑昭銘以儆勿踰其閑

延慶良法師塔銘

天台之學其說汪洋浩博旁訓廣詁多至萬言學者讀其書前迷後遺究厥本
旨更席不能以終良法師始疑之謂由律以入則心以攝持由禪以入則心以
解脫玄文妙旨約以據要事理昭晰如瘖獲吐如盲獲覩其爲書曰十門指要
約說三卷指要餘論一卷教觀宏立門分戶列貫穿出入莫窮其塗師以諸部
證其義例條焉不紊示焉指掌其爲書曰教觀撮要四卷三千別說則其師覺
法師之言具在舉世尙同因省立異良非苟於言也師名善良字子直號月溪
族姓朱氏定海縣人始祝髮淨居習律湖心游杭之大雄師頑空覺大師空閑

不二門所屬三諦三千其旨意與空合覺大師言辯簡峻師入其室嘗俾守講席後游淨慈訪禮禪師以古德語叩辯禪語瞬息眩晃意師泥名相爲可惑師徐曰三觀之旨不外乎是禮謝曰其歸振汝宗集慶寺成朝命選主席班從者亦皆精良晦法師主上竺任可否師預是選講大涅槃經聽者雲集師懸辯提機整暢理得然卒師頑空上竺不能強也主禪惠擇陽報國藥師治平戶屢日接別爲堂以處篝燈星列咸曰是宜繼四明矣歲旣久卒以輿論主延慶至元二十六年寺延燬芟舍草緝講論彌不輟大德元年九月某日入寂僧臘六十年七十有九奉遺骨歸于祖關桷居邇南湖幼歲游起信堂羣僧誦聲接几席取其書讀之茫不能解泰寓曹先生說曰取子直約說讀之斯解矣後來南湖覩其容和以莊其說坦以明始悟曰先生語不虛矣歿三十有一年弟子允恭來請曰公深知吾師吾教有行業碑敢以請乃不得辭銘曰

天台之宗明性合理銖縷其別弊極口耳以言顯道言曷有止若舟在川茫不有涘若蓬繫風去莫以趾支離演文積沓縑楮迷途具茨珠探濁水至簡以求

允究厥旨聚不滿握邇納步跬解其桎梏一貫真詣南湖之庭屢履纒纒振塵
一言聞者竦起遺書具存毋敢訾毀昭哉是銘千祀勿圯

空山雷道士墓誌銘

孔子曰文勝質則史班固亦曰道家者流出於史官豈其然乎老子爲周藏室
史酌古今治亂成五千言致用以準易較其治良不誣也噫爲老氏者其知此
與河圖洛書聖人則之易書誠經緯也微言旣湮傳注門戶各立自勝易與書
迄不能並士方斷斷然不可參錯進老子之說焉得力而勝諸士患無恆心遇
不遇命耳曠百世而相感者吾得一人焉曰雷齊賢始予讀其書益知其所以
言病乎世莫知其涯也齊賢所爲書援據切至感厲奮發不蹈世俗繩墨合神
以窮變盡變以翼道申言廣指其於力誠至矣今知齊賢者不若是則齊賢之
意將終無以自表齊賢於書無所不讀悉資以爲是書者其道然也道散於九
流百家同歸而殊塗唯老子最近然則易老誠相表裏邪嗚呼齊賢之志予深
知之矣齊賢著書曰易圖筮通變義老子本義莊子旨義所爲詩文二十卷和

陶詩三卷齊賢名思齊家世臨川人幼棄家居烏石觀晚講授廣信山中暨終也復歸烏石治其窆而先表焉表曰空山雷道士之墓卒時年七十有二番陽吳成季廣信弟子也嘗曰空山先生承絕學於蕩裂繕刻志意卻甘茹苦光景變幻皆隱慝不道飛伏控握愈眩愈遠道無有矣今遺書具在匪吾徒私彰確者如是則行若藝猶其麤也陳郡袁桷以是銘銘曰

入而不出神不可以物通而不塞用不能以怵膏軸御輪其行彌踈無適不宜曷問其津生以道爲樞死以天爲徒有隆空山泉流舒舒矯爾後人抑華食實弗績弗雕我銘是質

戴道士墓誌銘

予讀桃源記私竊以爲慕肥遯有遺於世者之說云耳後讀地志則沅南地今號爲桃源者不與王化邇安食水土無君臣守令之程節於徵需乎何有嗣後地益闢桃源遂爲壯縣溪峒增爲十州今烏能辨桃源也哉或曰州有桃源宮累聖蠲復山水清湛其人醇厚直且信使能居之寧非桃源乎戴君道安和甫

其人歟和甫成童辭家爲道士性疏曠無畦町其師王君文卿器之俾遠游見
開府大宗師于崇真宮隨其委令風雪承給不少替請於人也事弗就弗止而
人不以煩避之處於衆也率退以自持衆先矣而君亦跂焉以及之故亦受制
爲龍瑞宮提點奉香于武當桃源性不喜臧否遇酒嗒然以忘然不復失事故
職教者彌任器世人以記短長逐日影爲能事君不能且鄙恥較其得失是真
無懷尊盧之民矣豈唯桃源民哉往歸其宮攜酒邀父老游白馬洞天洞近長
磧山酒酣援筆述韻語曰吾死必藏是延祐七年還京師明年改元至治正月
某日微疾以逝年若干斥其囊資不能以斂遺言以弟子李禮謙領宮事和甫
在崇真度弟子天台徐信初厚禮翰林待制虞君伯生俾教之伯生與予皆故
家見後進傲誕不復與語獨信初給事無惰聞論文獻道德嘗惕悚不自置信
初果能爲請銘君斯無憾矣某月某日葬是山銘曰
棄方刈觚睢盱以趨何誕之日多樸莫能扶瞻彼沅溪中季載圖其德弗雕其
人允符持觴養和奚憾之社命也不尤卒爲天徒

通真觀徐君墓誌銘

開府玄教大宗師張公留孫以玄道贊理陟降帝庭踰四十年其承次授受同流一源罔有支別故其弟子相傳多至六七十人以文辭議論達國體者爲之嗣教其餘彬彬行能清整英發林立輩出或激昂自脩則俾之挈綱振維往來京師山林間重其名教若是者寧不備矣夫開府弟子之最長者曰徐君余官翰林十有六年未始識之延祐四年開府年七十始來上壽閉戶不復出戶限邂逅予庭中若相避然者集賢大學士李公某傳詔醮崇真宮益避跡隱奧中集賢語開府曰聞高弟在是願接顏色可乎強之見揖以退復辭其師曰弟子歸山中不來矣願師自重至治元年專价走京師作訣別語衆咸疑焉未幾訃至灤陽以夏五月癸巳化于仙源宮得年八十有二於是嗣師真人吳全節率其弟子爲位以哭皆不勝其哀且以狀求余銘維徐故士族祖某父某君名懋昭字德明饒餘千州人饒爲衣冠望郡宋端明湯文清公丞相江文忠公善衡鑒幼獲接識之由是棄仕譜爲老氏學以其道游江淮間于時烽燧連警百里

土舍不相接獨澗飲草茹以善勸勵俾崇信其法後皆化之開府公入皇朝隨侍二歲卽歸且誓曰釋老以募衆集施爲能事叩門嚙躡抑獻笑且取誚吾不能若是當益貶損焉積數十年作仙源觀久之復作神翁觀佳木奇卉編輯墾治山林壟畝陂塘之利益充然衍裕卒能遂其初言歲饑以餘食餓者不足則損直以售葛衣布幘十數年始一易見者服之老氏之學力本自治退足無欲其言黯以彰不知者以虛無釋之邈不相涉矣夫不丐於外則必慎於內宮室蔬藪絲麻丹漆之物燕與俯仰之節酬酢進退之儀人之生不能以缺也今而曰吾無求焉將何以取具世以役鬼神竊服食爲道吾不能知之不惑於衆則害於民者寡考其自治則於吾道合清淨富強昔之時君嘗師之則凡刻繕者誠得矣夫何疑焉余嘗侍開府公言語絕臧否者而謙默而簡退與嗣師游彌綸損益將以行其道是非家庭之教績業纂素能若是乎盛矣哉大德六年制授主常州路通真觀皇慶元年制加保和通妙崇正真人二觀亦以璽書尉鎮焉以是年某月日葬某山開府再傳曰李立本陳義高義高明朗通豁器行瓌

特贈粹文冲正明教真人皆蚤世今以次傳者曰余以誠何思榮吳全節孫益謙李弈芳毛穎達夏文泳薛廷鳳陳日新餘若干人將葬開府惻然曰吾弟子蚤從吾游其亡也不宜以薄乃命弈芳歸泣葬銘曰

林林生民厥初一原帝霸肇分兵刑日嚴維玄元君治道不繁節約寡求罔有僭貪榮觀超居導迎泰和絕色屏味日用不頗後侈怪奇風揮電訶造舟構臺百靈迄訛赫赫大帝尊企清淨玄風恬寂守貞自正温温開府不夸不佞于帝左右淵默無競在師承之儉以繩之泯泯自營卒克與之道合古初訖莫我病銘昭真宅是式是證

陸道士墓誌銘

道家者流以清靜無名爲本時王以其宜於治國靡然宗之傳世益薄長生之說侈卒茫昧不復講今世所傳唯法藥與術藥術又鄙棄不用而法僅傳謂其宜於水旱疾病通得而用之也余行天下與方外士游率不得一二蓋其傳受訛缺浮靡恣蕩攝思握神罔不知所以而其祛役禁制按圖以求叱咤瞬息欲

通靈於胎鬢不可得也噫其教若是而爲其學者又皆不自植立可哀也矣余
居近東嶽行祠有陸氏者掌其祠有年矣其四世孫曰頤真幼歲識之儀觀秀
整淵乎抱道之器與之語慎重不伐悒悒然欲求其師未能也日尊所聞抄綴
盈篋樓楚公諸孫坦好黃老能以參考損益編簡往受其說遂爲弟子後聞天
台桐柏山有靈寶法福聖觀道士曹君爲正傳往師之又聞維揚潘師得白真
人上章法遠游以受然不自表襮處羣衆益簡默丹經筮書星歷孤虛之術悉
究詰旨要晚得末疾疾漸革呼其弟子陸宗玄張蒙生語授受本末且曰我死
必得袁內翰誌文以信後是死爲不朽當葬我於先母之墓側墓在翔鳳鄉白
石紫虛觀右紫虛樓君所建實繼其事曾大父軾大父景文考斗瑞生宋開慶
元年歿時年六十有七寶泰定二年七月某日也葬以某月某日其弟貴和實
來請銘哀其志嘉其勤而卒不逢非命也與銘曰

握奇制氣超鴻濛約束萬神驅霆風物無疵癘玄感功祕圖靈籙昭羣蒙後生
棄暴甘盲聾嗟哉紫虛憂忡忡踰江越嶺冀一逢死生晝夜在反終不怛其化

輪旋空恍兮步虛出雲中有縞之鶴來城東

清容居士集卷第三十一

清容居士集卷第三十二

元 袁 桷 撰

行狀

翰林學士嘉議大夫知制誥同脩國史趙公行狀

曾祖伯洙宋朝請大夫知南外宗正事贈金紫光祿大夫

祖師雍宋朝議大夫直寶章閣

考希聖宋宣教郎史館校勘

公諱與熏字晦叔宋燕懿王德昭九世孫高祖子英宗正少卿避地南徙紹興間爲台州黃巖丞家于縣之西橋至其子孫遺育蕃衍故今號西橋趙氏宗正有孫師淵字幾道官至太常丞爲朱文公高弟文公述通鑑綱目條分例舉整齊芟奪迄于成書皆太常所定其言理學蘊奧心受耳屬精析該邃非若語錄所傳剽臆謬妄東南後進咸尊太常與黃榦氏並於公爲伯祖公少美儀觀音吐清徹讀經史大義必本家訓弱冠以易入宗學登咸淳辛未進士第用積舍

法教授鄂州鄂為楚上流歲備武不懈公視邊將翫弛而咸淳士大夫率恥言邊事乃策諸生而問曰文武之用不可偏廢韓范二公不以言武而失文曹彬狄青不以清談而喪武文事武備豫然後立時未幾王師絕江守以城獻公自念為宋國族鄂先內附兵勢若破竹不可支而歸道已斷絕不得返遂上書丞相巴延松年案舊作伯顏公言宋權臣賈某柄國十有五年脅威罔主棄背信好事一

至爾今得冀如藩臣歲奉貢幣願緩師以行成焉書未報而錢塘已下實至元十三年也公知南北已混復上書丐返田里會大臣有奇公狀貌告于世祖皇帝十四年遣使上驛來京師幅巾深衣見於上京天子清問溫渥首詢其老幼及江上事首尾其對復如上書所言特命給廩餼以俟用明年奏言江南郡縣戶口繁夥當以簡易治近歲有司急切興利殊失安輯新定之意臣生長江南悉習利害因條類為十六事以進大較以擇守令釋征斂厚風俗為急而未復以存活趙宗為請十六年入翰林為待制陞直學士復兼集賢又三年遷侍講學士預纂寶錄加太中大夫於是侍講十四年矣累疏乞致事歸里雖未得旨

而不入翰林者幾二年久之拜翰林學士自鄂之來京師凡二十有七載由里居而之鄂也適三十年每恨乖隔愈久冀一得請以終老丘壠常忽忽不樂秋風倚楹懷悲故鄉擁衾障袂聲出金石非復以宦達爲可戀惜而志迄不遂抱疾暮歲以卒大德七年正月二十有二日也年六十有二積官至嘉議大夫公之爲侍講也言江以南括責營聚皆大臣與其黨類私植貨累鉅萬願寬今年田租以緩赤子宋世陵寢毀掘及移徙故宗室大姓皆非初詔本旨乞正其私擅之罪天子以爲然又言乃者庚寅歲大霧四起越翼日癸巳夜地震地爲臣道臣強則震至正月甲辰西城老虎就擒虎於象爲兌爲金其著尤異咎在姦臣竅權今已執咎而宸斷未果願蚤正天誅以應變異上意若微忤而終不以罪由是居家待罪閱三月大司徒公自上京俾燕只干學士諭以復職後平章政事博果密松年案舊作不灰木復爲公奏逋負歲積不能自養上曰得非指僧格松年案舊作桑哥爲虎者宜令有司計逋以償歲別給帛粟餘勿爲例人益知世祖皇帝神武沈斷非真忤公公天性疎達與人交緩急高下盡力傾引弗避不爲刻峭自

高亦不復計得失成就故始爭趨慕而間輒掉去訖無毫髮恨意傾觴煮茗費盡卽止危坐清論一不以靡密缺乏廢其雅道歲時奠薦雖甚匱嗇猶豐絜盡力如舊禮自宗正四世而下皆請于朝而復其役族屬男女以及鄉里之俘虜而北來者悉贖以歸凡十一人有張生貨藥西關一日過之張死已數月矣亟歸視藥券盡酬所負其家人不知也遂具以告而歸之一士人伺公錫賜時謾言當買田毫宿間計資與之歲久不至後亦不問其受欺類如此同列有侮公爲方拙暨死之日朝野咸曰善士已矣各賻奠哭弔終其斂事而同列亦悔昔日所侮爲可愧往右丞許公仲平篤意道德性命之學奮自飭厲以文公四書爲標準達官高胄皆俛首承訓不敢怠公時至京師首言力行致知近世率清曠自高言行若柄鑿不相入非儒先本旨許公深然之至觀其平居處身待人抑華養實許公雖死而昔時門人親聞其言者皆以爲伊洛源委惟趙公爲真似益以知太常之學爲可信至公爲有傳矣有詩文若干卷類聚藏于家初娶舒氏御史中丞亶之五世孫未踰年而卒斂篋中裝歸其婦翁不娶今夫人史

氏奉直大夫知連州一之之女生三男子長孟實以公居朝廷久特官爲承事郎同知瑞安州事孟賚温州蒙古學教授孟貫以廢入官孟實等欲求銘當世有道以信于後俾桷有述謹具歷官行事如右謹狀大德七年七月日從表姪具官袁桷狀

推誠保德功臣開府儀同三司太傅上柱國追封薊國公諡忠哲梁公行狀

公諱德珪字伯溫姓梁氏大興路良鄉人八世祖德成遼末以勇力善賞雄鄉里生子吉不仕吉子伯溫金皇統進士官通議大夫同知河南府事遂贈吉安定郡伯郡伯孫牧牧子陟明昌進士官中奉大夫同知南京路都轉運司事亦贈其父安定郡侯郡侯有別墅金世諸名士日觴詠從之游中奉髻年能以詞章相周旋咸器偉之晚歲直節善政深自植立值金亡終老於里生衍爲金承奉班祇候祇候生守信終隆興都轉運鹽使轉運生國禎終內藏庫提點是生公後以公爲左丞時朝廷特號中奉曰通憲先生轉運贈榮祿大夫定國公諡

忠毅提點贈榮祿大夫安定郡公謚僖敏公幼歲給事昭睿順聖皇后宮中奇其器骨俾熟國語通奏對年十一太府長官愛之帥其弟德瓚同見世祖命相者閱二兒相者曰後當貴帝領之遂使從東平忠獻王安圖

松年案舊作安童

習憲令

儀注十四年卽襲父職至元十六年升中書左司員外郎二十三年遷右司郎中踰年復左司二十六年進太中大夫總管大都等路打捕府仍領左司是歲復右司二十八年參議尙書省事復遷中書二十九年世祖特旨拜參知政事成宗卽位陞中書左丞大德二年拜平章政事公未弱冠卽官宮省踰三十年錢穀出入高下若指諸掌四方奏請率面授中書掾言某事當如律某當如先帝某年所行極邊宗王急驛調發卒無所從具同列拱手不能語公徐言軍用有故實泛索非故事不可行執筆量劑退考故籍無少訛誤戊子歲地震北京世祖問今歲刑部所報囚徒何煩多公對曰囚非犯刑罪特以徵索羅織無所從納故悉爲囚在獄中上大感悟乃悉赦天下逋負京師供給繁夥屢奏蠲復之漕運根本江南浚治諸湖堤不宜使富民侵塞以殺水勢議自公始選部資

歷吏不敢後先一時以事功自期者公亦與一二執政議超常格俾自效方大德初元成宗恭儉守成一繩祖武公亦以朝政自任年穀豐熟四境寧謐廟堂大臣相戒以清淨爲治凡尙書言利害斂口不敢發自是希進者皆避匿後議相持旣深朋聚比進乘事間發浸淫於疑似之際會上不豫遂出公湖廣安置踰年上疾稍瘳罪一二幸臣急召公還都遂乘驛朝于上京上問卿從何來公環視嗚咽不敢對上賜酒饌命歸省其母諭以將再用至九月詔復入中書時公已得上氣疾與家人言向嘗遠謫今得再覲上明白母子相完聚卽死且不恨何敢復有希進意遂卻藥危坐謝事某日星殞西南有光流室中是夕薨年四十有六葬于宛平之樊村妻安氏今封薊國夫人柔靜能家子一人某女三長適納速刺僉事次適伯達某路都提舉幼適某同知宣徽院今上改元詔祿勳舊贈公推誠保德功臣開府儀同三司太傅上柱國追封薊國公諡忠哲而公祖父亦復追命爲國公母夫人完顏氏公能承侍盡道待二弟曲致恩意對賓客謙不失禮自以先諫踵世科尤重儒士詢考安定別墅爲圖表章一時縉

紳咸賦詠追美其事侍帝左右率偵候意響獎拔士類至於決事占奏悃款不讓而悉簡愜稱上意死雖十餘年朝廷至今猶稱道之前翰林脩撰知高郵府張某次公遺事命楠演潤將求鴻藻以表墓道楠與張侯曩同在翰林見一時行事張侯以親嫌爲辭公之弟德璋今益都總管昔爲慶元判官時楠居鄉里得聆公言行遂不敢以草野爲辭然舊聞中原故老嘗言梁斗南文采風度有陶靖節晚歲志意後進爭慕企久知乃通憲先生也先生言行在人口不絕方金將亡時士族解散澌盡暨獲平定推原高曾名字於荒碑野塚之際皆缺軼無所考獨梁公八世官簿歷歷可据德源深長通憲守儒之效著矣至若公行事在史冊者不敢有私姑次其出處大致使銘述者有考焉延祐三年九月某日翰林待制承務郎兼國史院編脩官袁楠狀

翰林承旨王公請諡事狀

公諱構字肯堂世居濰州家譜云與中書令同系八世祖某宋世爲司農卿守鄆因家焉故今爲東平人曾祖某金進士奉訓大夫滄州無棣令祖某以公貴

贈正奉大夫太常大卿考某贈昭文館大學士資德大夫公幼歲肄業郡學試
詞賦入等杜先生仁傑深器之賈文正公居貞一見館以教其子載與來京師
時太保劉文正公王文康公王文忠公持薦士權卽辟爲權國史院編脩官丞
相史公耶律公在政府聽公上事言論接以賓禮耶律公復戒其子以兄禮事

焉至元十一年授將仕郎命爲真于時集議時政必使公預會裁酌之十二年

丞相巴延松年案舊作伯顏出師諭江南公實草詔是歲渡江世祖命翰林直學士李

槃與公偕行俾蒐擇儒藝之士明年春次杭州公見董壽公某曰故宋圖籍禮

器具在宜收其祕書省天章閣翰林太常考集目錄宋史異曰必脩纂遂悉輦

歸于朝十四年充應奉翰林文字公辭曰少嘗受學于李先生謙今先生猶教

授東平實不敢先遂以其官召李明年始受之十六年陞脩撰凡制誥撰述文

康公必以命公丞相齊魯國公和爾果斯松年案舊作和禮霍孫下同領翰林開司徒府授

府司直世祖詔大臣議道藏可焚棄者公與議完救之十九年丞相阿哈瑪特

松年案舊作阿合馬敗齊公入相議選舉更定法皆公手定遂授吏部郎中未幾改禮部

清容居士集 卷三十一 五 中華書局聚

後復吏部而翰林制誥猶諉公參詳焉二十二年遷太常少卿上方定宗廟條

禮樂而公昔從故宋所輦還者皆得補缺二十四年出為江北淮東道提刑按

察副使御史大夫率公陞辭上賜酒慰遣擊姦惠民淮民猶能言其事二十七

年除治書侍御史故相僧格松年案舊作桑哥下同嫉公命與故平章魯公博果密松年案舊

作卜忽木檢責燕南逋負公先馳驛會計簿領迄無所迎合謂魯公曰公近臣某復

在言路相若苛責當受罪不以累公也未幾僧格伏罪二十八年調選江西二

十九年改翰林侍講學士三十一年世祖升遐成宗嗣位分院上都制誥多公

次定徽仁裕聖皇太后知之特賜楮幣七千五百復命譔世祖祔廟諡冊攝司

徒以導禮大德改元纂脩世祖實錄陞翰林學士二年參議中書省事右丞相

引見于柳林上問昔從何人丞相奏是和爾果斯官屬真儒者昔奉旨參用儒

生今故用之時上初即位勵精文治年穀屢熟海內熙洽公從容二相間以薦

士安靜為急務後數年來執政希合生事將檢括增羨首以其策行東南公卒

不肯附稱疾納祿幾一年七年前廷更政獨公無所累歸里九年授濟南總管

禮法自持嚴而不苛凡爲民害者悉除去丞相答刺罕見公所申牘咸從之十一年太師瀋陽王等奏俾乘驛造朝拜翰林學士承旨復脩兩朝實錄特命贈公二代公言臣本儒家遭逢四朝先世皆潛德里士大國美諡懼無以稱以臣所居官授之誠以爲過今羣臣封諡下太常必由翰林議官品臣首踰越將無以服衆今上時爲皇太子嘗詢翰林老成必首姚燧王構手以酒賜之是歲尊諡祖宗公譔太祖睿宗皇后諡冊賜楮幣萬緡正月譔皇后冊文攝侍中讀冊至大三年以疾薨公在朝廷踰四十年凡累朝憲章損益能悉舉源委翰林述作自爲編脩時已預譔先賢文懿尊酒敘論咸有据依欲輯爲臺閣舊聞而事莫遂崇拔後進雖未識面汲汲稱許不絕口性剛直有不善必面責之有文集三十卷藏于家子士熙今爲翰林待制竊惟聖朝褒錄臣下見於令典謹撫其居官行事請於太史上於太常至若居家雜儀治民遺事悉弗敢次第延祐三年九月日門生翰林待制承務郎兼國史院編脩官袁桷上

李司徒行述

代作

嗚呼我先公之亡銓時年十有三遺言懿範誠不盡知雖知之亦不能盡詳少
鞠于趙氏外家外大父諱某爲南京同知先夫人嘗泣語銓曰汝父沈靜寡言
笑篤志嗜古卓然遵聖賢言行爲矩範強之仕弗肯仕凝塵敗席家事靡密弗
顧疾革猶執卷矐然若有思空約彌甚間嘗曰我幼孤長兄樞密都事教我撫
我繫汝舅之訓汝舅生三子長都事君從革次總判君從謙余敘爲季生兵革
中我先君每誨吾兄曰家世朔州罹亂離朝夕習騎射今邊宇寧謐諸兒宜守
儒顯親毋刻木吏爲也都事受其言朝夕以詔二弟俾從學于九山李先生徵
吾詎願不仕非其道不可也銓幼不能必其成後其語諸又曰大父之墓在朔
州地遠不能至考其事則有紫陽楊先生之誌在戒其毋忘焉不幸某歲卒年
四十有一葬于南城柳村之原先公旣卒家益困太夫人挈于外家化治銖粟
率資以教銓稍長痛自感勵有以其名聞于世祖皇帝詔習儒業入國子學師
許文正公焉後直省闈三年出爲彰德鐵冶提舉又十年同知歸德府事始得
致養于母夫人元貞元年過汴梁將歸京師不幸夫人卒於汴卒時年五十有

八奉柩歸葬于柳村相其地水齧洳不可旁祔乃卜於西山金河口田峪之南得合葬焉冬十有一月某日也元貞元年爲翰林待制又三年轉廣平等處鐵冶提舉改工部員外郎承檄視屯田雁門雁門地近朔州銓思念吾大父葬朔州在鄠陽灰河西一里今六十年榛莽不可致有楊先生英誌在雖無能知吾以誠求寧卒使無知哉翼日驗誌徵旁近卒無有哭走于野有老叟年八十餘乃來曰李府君葬時吾嘗治畚鍤于灰河今西一里隆然者其墓也銓泣且拜得封崇以識焉楊先生之誌曰李君大父諱彥宏由彥爲名者十八人自彥而別爲王者二十六人其諱玘者銓大父也我先考大父之幼子也都事有子曰某總判君無後銓由是奉都事而下皆合葬于西山而灰河之墓始樹楊先生之碑推大父燾後之德遭時隆平非若昔時之永隔歲時省墓則力猶可至也楊先生之誌又曰大父爲山西西路課稅時耳目所逮纖悉必陳於長官有以權翹牟利卽峻拒絕後患或言郡縣始安輯宜用重典使不犯輒面折陳白非忠厚恤民本旨先公之誌翰林承旨王先生構則曰拱壁駟馬流俗所恃疇者

先公無是心也銓無所肖似自工部改授朝列大夫揚州路同知臺擢爲監察御史四年少中大夫河北河南道肅政副使五年移淮東未幾嘉議大夫常州路總管不六月召爲參議中書省事又六月除禮部尙書復五月轉燕南河北道肅政廉訪使改昭文館大學士中奉大夫治書侍御史今上皇帝推賚存歿於是得贈大父資善大夫司農卿上護軍追封冀國公諡莊順祖妣王氏冀國夫人考榮祿大夫司徒上柱國追封冀國公諡端敏妣趙氏冀國夫人嗚呼銓無所肖似承藉先德先夫人之訓歷歷在耳願因朝廷光顯之寵求文鉅公表於墓道俾李氏子孫後有攸考謹再拜敘其事于右端敏公諱從益銓今爲翰林侍講學士娶孫氏封冀郡夫人合三房孫凡幾人長某延祐四年九月日男翰林侍講學士中奉大夫知制誥同脩國史李銓狀

資德大夫大都留守領少府監事兼武衛親軍都指揮使知大都屯田事贈推忠贊治功臣銀青榮祿大夫平章政事澤國公諡忠宣鄭公行

狀

本貫澤州陽城縣澤陽鄉屯城里年四十七

曾祖珪不仕

祖臯故忠昌軍節度使

父鼎故鎮國上將軍湖北道宣慰使贈銀青榮祿大夫中書右丞諡

忠毅

公諱制宜字扶威澤州陽城縣人大父節度當金危亡時以智略慷慨衛拯里社興屯田陂池之利年不展用是生忠毅公提天師勦羌蜀絕襄漢奇勳冠勇功次表焯官譜始著公忠毅公之嫡子也方勝衣時忠毅攜見于世祖皇帝特視偉之命從大臣習給事儀忠毅遏寇死難世祖震悼乃卽授金符襲平陽太原之軍而戍鄂焉公盛年受殊數益矜謹自重控伏將士帖首無撓犯湖廣行中書治鄂戎帥策馬進退承教令縮蹙不自給獨公爭器重傾下鄂守缺長執政俾攝治日坐決文武兩府郡益以理凡數歲訖不除鄂長官十九年詔治樓船有事於島夷江澚地不足居船官城南有何家洲洲爽廣多居民中書行令

遷洲屋仆徹墉瓦聲汹撼白日交走驚泣道上公行相旁近地與洲無異卽趣還其居洲民爭持牢醴拱謝公揮手曰安民吾職也何謝焉鄂多火災連晝夜交作或言城中隱姦利羅疑似者急治火可止公言咎在火政不明火未絕而復誣構彼何生爲遂率軍士申令約立渠巷俟火所未至通徹其道火是日乃止有盜私立部號伏近郊日暮剽劫負擔者訛言將入城索之不得見數男子從城外來促數異顧命縛之省貴人曰得無以疑註誤將出之明日過城東門見一少年乘白馬行且色動公呼曰汝賊也汝貌良人也何作賊不速言當訊汝少年叩首吐實復信宿日所捕亦同款一郡大驚二十三年徵入侍中明年從駕北征願前敵效擊上曰鄭制宜死唯一子在宜勿使擊復請戰乃命從太師以行師還詔侍膳殿中加懷遠大將軍樞密院判官春駕如上京院留毋行公曰年少宜服勞願以偕行上愛而勿許二十八年超拜湖廣省參知政事是時鄂大臣集括斂爲奇功上怒錄其家公入辭上曰而父死賊難賞不及于汝今有盜臣貲財僮孥留貯于鄂者宜擇精善自取公對言某臣家人皆賊穢不

可詰受之雖無汗然跡其由來寧無汗乎上益奇之鄂爲舊治土俗厚薄悉周知其隱蘇枯翦彊翕然至和上知其能賜中金五千兩間歲具口奏臣向留鄂治兵臣母知臣年未更事乞臣侍陛下宿衛今不以卑鄙預外政府朝夕思念不勝任敢昧死以請復徵爲內臺侍御史安西地歲牧馬牧人利曠遠率併入旁近世業民數訴理求地持軋不下命公乘急傳治其事覈地得三十萬頃考籍于官餘悉歸于民三十一年拜行樞密院副使院治衡州公統軍入衡下令不得入廬舍營部擇便地定井竈食罷畢發至暮整列就次道遇兩卒言宜止頓舍休憩公立兩指畫訖一卒無敢宿民居道旁市井人雜語不知爲官軍也湖南地介江廣賊負險煽昭賀聯絡廬陵諸屬邑大軍至卽守固不復出歲一捕寇率害善地寇伺去復獻集如故公至相阨塞雜耕守戍據其出沒明語歸降者釋弗殺逐殲其酋長茶賊譚計龍匿兵器有異志立捕得之其弟昇貨以緩事公趣輸于軍卒正其罪成宗皇帝改元復別置副使一人與公同治公謂官盜常員先置者當罷入授大都留守領少府監未幾兼武衛親軍都指揮使

知大都屯田始進階資德大夫公幼熟內府營繕工巧供給祠祭之屬能通達
緩急終歲事集無曠敗至大宴席刀匕樽俎必命公董領以重其事大德七年
地震太原平陽公承命往視且言河東罹鉅創聖天子出粟幣以賑活之設一
不及是負明詔死罪萬萬何可逭乃躬入里巷傷殘羸餒悉疏錄以給有市官
利征商詭言某地少災不宜費官廩征法宜如昔無所損公怒曰幸災困民民
何罪且汝計征入何補縣官入言于上復其地三年公天性慤厚上宴大明殿
獨侍立不惰命之飲再拜辭上察其意賜酒二壺使歸飲于家事母蘇氏至孝
特封潞國太夫人以寵之錫賚無虛歲復加賜海青俾入禁園尤號爲異數大
德十年二月五日以疾薨年四十有七其葬在某縣某鄉自公少時已知自貴
乞名於王文忠公王見而器之遂定其名字忠毅以死事顯故公彌欲以忠孝
勉獎通敏有持守其居鄂十年善政藹著至今父老言鄭公真清士非他人比
至守官靖正不以喜怒害事謙抑自晦中朝士大夫則曰鄭公真吉士也配可
烈真氏丞相孛羅公之女子鈞今爲懷遠大將軍武衛親軍都指揮使至大更

元特贈推忠贊治功臣銀青榮祿大夫平章政事澤國公復下太常定諡曰忠宣謹具歷官行事鴻筆碩彥得以取擇謹狀

榮祿大夫大司徒特封饒國公吳公行述

本貫饒州安仁縣開興鄉壽樂里

公諱克己字祥甫維吳氏遠有令緒泰伯以至德讓嗣逃于吳周受殷命大封同姓而泰伯胤系因食采吳地子爵不絕周既衰吳越楚爭王吳爲越所僨子孫散處江湖間因以國氏夫差六世孫芮爲秦番令有德于番號番君漢次芮功封長沙而廟食番世不絕宗庶蕃衍凡占籍番者悉祖之安仁吳世儒家宋淳熙間有從朱文公講學曰某皆其譜謀公之曾祖岳祖夢旂養潛樂幽丘園晏如也父鑑服儒業言行矩範閭里是否能持平善諭俾率初後皆尊信之劬書教子誨之曰學非以干祿遇不遇命也故公受其訓而行之幼靜默寡嗜好遠生養和非仁義之言不言其居家也斥絕喜愠躬行以導之不逮者微語以警之其處于鄉也肅然如有容暴者化之以慈有爲不善者輒自勵曰得無吳

公知吾所爲乎幼督之以學壯獎之以仕稍有能輒譽之其成就也怡色若己
得年益耆賓客造戶無惰媮酒至愈莊夜分猶危坐治纖悉人皆曰吳公有子
全節爲玄教嗣師總攝江淮荆襄道教崇文弘道玄德真人其好賢其持身常
念若不及繫家教所致推公之德視其子則猶可企也延祐六年五月玄德扈
駕上京楠以待罪集賢偕行公薨以五月丙辰訃至玄德晝夜哭不絕泣且曰
全節不天疾驅以歸願述先公之行以聲其哀楠謝曰述德敘行宜在門人佐
吏敢辭則又曰猶子善辱與子游其何辭謹按玄德真人幼慕老子道年二十
從大宗師開府張公入朝奉祠宮間歲告歸省成宗皇帝憫許之大德八年公
與夫人壽七十一上賜公上尊加帛俾乘傳以歸大德十一年特拜翰林學士中
順大夫至大三年武宗皇帝隆孝治恩賚中外臣子由是超拜榮祿大夫司徒
饒國公配舒氏饒國夫人而公考亦追贈昭文館大學士資善大夫饒國公諡
文靖妣陳氏饒國夫人玄德奉制書以歸延祐元年公壽八十天子遵成宗錫
賜如故事延祐四年復降璽書復其家命守臣王都中表鄉曰榮祿里曰具慶

玄德築公所居堂曰晚香曰天爵翰林侍讀學士元公明善記之矣曰齊老則因宋孝宗所書扁以徵其實曰樵隱公所居自號以寓其沖澹之意焉公壽八十有五將以某月某日葬于鄉之山田原子四人長詢次誠蚤卒次玄德真人次全義女若干人孫男若干人善集賢脩譔蒙剛才致孫女若干人曾孫男女若干人始善來京師從游嘗出大父手書誠善制酒力纂述勿愒玩以自棄又誠其叔父持敬存誠爲應天事神之本日承君師毋以我耄爲辭幸未棄昭代嘗惕然深念曷報稱數數道途非所望假我死何憾也水蹇於山屈曲演迤遇順而始達非偶然也養深用嗇累遠益振於吳氏有考世胄顛覆抑其所發者誠過耶嗚呼吾於是見之矣楠也辱再世之游耳受目矚向爲史官錫命享醴之禮嚴詳於記註惇史純孝贊皇風闡鴻藻有自來矣遂不克讓奉于太史俾有攷焉延祐六年七月日具官袁楠述

清容居士集卷第三十三

元 袁 桷 撰

表誌

西山阡表

嗚呼我大父嚴州宋寶祐五年丁巳六月七日庚寅卽世年六十有七後六十有七年是爲皇元至治三年歲在癸亥聖天子推恩文武錫命有秩不肖孫桷以從臣遂得贈中順大夫上騎都尉會稽郡伯大母令人王氏會稽郡君是歲五月丞相忠獻王薦于英宗超拜侍講學士泰定元年又贈嘉議大夫禮部尙書上輕車都尉會稽郡侯郡君加會稽郡夫人嗚呼桷生七日而母史夫人卒先考處州嘗語曰汝外祖敷文轉運公諱賓之淳祐十一年辛亥歲秋八月病且革嚴州訥疾候所命于時汝母年六歲余年七歲卽指曰吾女以中外表願奉公幼子大父謝且立曰幼子獲爲越忠定王孫壻宅日生孫寧負吾兩門哉桷泣受其語以識桷髻亂時喜聞遺事于時越公賓客子孫宦途著仕而大父

遊從咸在嘗語曰越公爲京尹十有一年摭括隱伏抑強振惠繫汝大父密以贊外若韋布使世不知有子弟名字其居越公喪盡喪禮喪除廬于墓不入城府者三年匪惟鄉人言之外州士大夫能言之退考于家乘曰初補承務郎監無爲縣襄安鎮知建寧府浦城縣丞越公久侍從陞政府而執政子求外仕令不許故再任佑神觀紹定四年越公解機政始得授江南東路安撫司幹辦公事端平二年以侍養請于朝優許之充沿海制置司機宜文字淳祐七年通判嘉興兼尙書省提領田事所檢閱乃曰吾得以仕矣治府事無留難囹圄以空悉以越公尹京法治之郡守謝不能提領戶部財用史宅之悉括諸司田阿媚奉上具籍百餘萬用戶部印入御府而以副帙置三省始愀然曰吾不可復治乞歸三年授江陰軍力辭以疾後戶部果督責浙西諸州虛籍守臣爭納告丐罷言諸司田皆朝廷舊籍欲入虛籍則宜蠲舊籍未幾宅之死始悔罷而副帙在三省者國亡散落民間言利大臣深信之卒爲東南害十一年知嚴州寶祐二年提舉台州崇道觀積官至中散大夫鄞縣開國子先處州登朝贈中奉大

夫再以登極恩贈中大夫維我大父訓範嚴密居家治具畢舉區別工技悉精其能堂奧危坐無笑色聚書至數萬卷圖畫鼎彝鑒裁得源委而先處州遵奉誠令教子晝夜不廢桷得以讓薄文藝敘升翰苑幾二十年再爲集賢直學士今復超進爲翰林侍講學士夙昔期望於遺言見之今墓在桃源之西山王氏夫人合葬焉大父諱似道字子淵曾祖諱皋累贈太保妣楊氏越國夫人楊氏魯國夫人祖諱昇累贈太師衛國公妣楊氏齊國夫人考諱韶少傅同知樞密院事資政殿大學士累贈太師越國公妣陳氏周國夫人配王氏平江府吳江縣癯庵先生份之四世孫蘇養直向伯恭張安國朱元晦諸賢賦詩于其家圃有詩集十卷行於世長子諱浚奉議郎淮西制置司機宜文字入皇元改授承務郎賓州同知娶史氏孫四曰棟棣棟孫女十曾孫五彥毅亨端辛孫女一先處州諱洪朝列大夫同知處州路總管府事贈中奉大夫浙東道宣慰使都元帥護軍會稽郡公娶史氏楊氏並追封會稽郡夫人子桷爲嫡長孫女三曾孫二瓘瑾女四人四世孫男曦曄女德秀袁爲鄞聞姓晉政府由越公始至子

大父承緒展世不赫赫以求高命所居堂曰拙逸曰得閒殆見其雅志將以俟于後矣夫德厚者報深恃報自佚必不能以顯郡公事兄若父讓爵避財鄉黨至今能言惴慄四十年而教子督切則曰我大父之訓我不敢私今雖未底于成詩書之澤殆能以自白歲月逾邁交友故吏澌落幾盡隧碑有缺幾於無傳是則有罪矧以不腆之文行于南北庸述祖德刻于墓道俾子孫有考泰定元年歲次甲子一月一日孫具官桷表

先大夫行述

先大夫諱洪字季源姓袁氏袁爲明州著姓州陞爲慶元宋仁宗朝詔外郡得籍開封舉進士嘉祐初爲開封舉首者諱穀後通判杭州蘇文忠公時爲郡太守日論文史典處州以終贈光祿大夫其宗諱毅亦占籍開封試進士歷官至祥符縣丞因家焉爲公六世祖五世祖諱謂贈少保高祖諱皋贈太保靖康難作隨青州兵復歸里積善好施年八十餘預言死期別親黨沐浴端坐以逝曾祖諱昇爲明州助教贈太師衛國公樹德力卑讓鄉里尊信郡有不軌大獄命

公攝治卽其家搜驗得僞署籍姓名一千餘人皆六縣大家不以送官立焚之
異行遺事世多所傳錄妣楊氏封太恭人贈齊國夫人祖諱韶幼學于族父正
獻公燮登淳熙丁未第嘉泰禁道學自趙忠定以下皆入黨正獻公坐廢越公
爲吳江丞得罪蘇師旦俱家居避禍嘉定改元褻敘趙忠定公朱文公於是相
次被召先後爲侍從搢紳榮之尹臨安十年神明愷悌自辛棄疾揚王休馬大
同丘密以後推公次之爲同知樞密院事以資政殿大學士銀青光祿大夫奉
化郡開國公致仕贈太師越國公妣陳氏吉國太夫人贈周國夫人考諱似道
中散大夫知嚴州總覈事物能通達損益然不樂仕進守次江陰將行乞祠祿
以歸理宗異之贈中大夫妣王氏恭人贈令人公嚴州次子七歲能諷誦詩書
左氏通大義以越公遺表恩奏補承務郎年十七試吏部銓監鎮江府大軍倉
明年道臨安馬光祖以樞密爲京尹上書往見之馬公喜謂曰是故袁越公孫
耶光祖治京師皆先公條教今官位適相同然貴家諸郎多不達文墨是書果
子所作當留以自近公謝不敏遂改辟監桃源酒庫檄入帥幕時馬公號嚴敏

客多畏避不敢進率秉燭決諸曹事命四客坐四隅禁私語夜分間以成案俾閱先後是否一日擇卷牘繁冗者以試公公疏其要領言是事曲直微有隱某官所擬微兩端馬公大喜日以不決事委處分將俾徵旁邑逋負公謝曰初入官而以括責稱懼失先公遺訓馬公謝之禮部尙書李公伯玉薦可治劇邑中書舍人劉公震孫薦可理瘠縣馬公去國改兩浙轉運司幹辦公事轉運使胡太初刻峭善伺時相意旨公不樂之請告歸里胡亟怒以綠匣檄還司署曰不卽來當議劾公起視事或咎之乃慰曰太初先子先樞密門下士知子能官固若是後潛說友爲轉運檄督寧國絹十六萬疋公婉謝曰嘉熙以來江東稅絹皆虛負實籍寧國尤甚莫若悉蠲虛名止取景定至今年逋且昔時嘗以不能謝馬公矣說友懼蠲數廣亟命他吏然卒不能辦爲禮部貢院封彌官甫出院度宗忽降手札諭賈某曰舒津太學名士袁洪嘉定名臣孫宜與陞擢差遣舒同里人賈疑有內援遂除舒太常博士公爲太社令就職兩月諷門下省論而舒亦以他事去賈相嘗曰浙東唯温處士可任事四明士不宜用于時高公衡

孫趙公汝楛以戶部侍郎汪之林以汀州陸合以軍器少監章士元以太常少卿趙孟傅以贛州合執政官至守倅凡六十餘人皆家居月爲一集約討論先哲言行不得議時事由是公益得紬繹文獻深愛重自晦絕不通京師書問賈相悉偵知之乃命主管華州雲臺觀咸淳壬申遷通判建康府公閱事敏決老吏不敢詒慮獄句容有僞楮連坐二百餘人悉出之定議止誅其首帥趙潛貴駮不親庶務僚屬上府謁不得入率用紫袋取畫諾公坐賓次命吏白帥今邊事益急惡少年掠奪市上將驕不習兵非紫袋可奉行帥聞卽延入閣出遜語且曰將循視沿江諸屯壘苟可安便者毋忌也甲戌冬十有二月帥行郡中大驚爭移徙出郭而村落民與故侯聯絡者復入城有約白晝罷市公詢扇亂者斬之戒門者毋納村民城中始安夜多火災有徼卒瞻對詳練公私以白金立署賊曹一夕卒馳報有賊約以二鼓縱火東門劫門鑰以出今賊俱在廟中治火具公遣卒往伺賊將出廟門捕二人有緼火在手卽斬以徇諸將留城者皆故侯部落至是益蹇傲願習射求官賞且曰在昔唯陳招捕習騎射今不能復

見此等相公矣翼日將巡城請公乘騎吏擇馴馬以進公命取將馬來將異之坐城上召諸將曰郡庫非制置使不敢用若等求較射吾當以私財定高下語畢入射將挾矢前喏曰願奉約束然不敢先公手弓遂弦三發皆中革一入的將謝不敢公強之終不能並卒定其賞如初諸將前曰惜侍郎官晚然事不可爲公嘿然侍郎蓋江淮間幕府通稱也二月帥調精銳居屯江城中羸卒數百相偶語有卒夜從江澚還言趙制置已南遁數日將解兵還淮西總領費伯恭棄軍資夜乘舟如通州入海賈相師潰歸揚州諸將率故侯部落將劫公出城公不得已微服間道歸臨安見太常丞吳浚浚舊爲沿江參議與公厚善相對各泣下公曰國勢日蹙諸將率聞風內叛浚薦丞相陳宜中將留用之公願自劾待罪急辭去趙公孟傅尹臨安奏爲浙西安撫使機宜文字不拜趙公制置慶元復奏爲沿海制置司參議官公時已陞階朝奉郎亦不拜乙亥冬臨安奉表降謝太后詔諭東浙諸郡如命戒毋徒以百姓汙鋒鏑時入南軍道上虞餘姚焚掠以行聲言留軍慶元備禦居無何王師將壓境公見趙制置言南軍以

具海舟實無意留旦夕必入城縱焚當先攻甬東門宜戒火政分卒保東城以全居民未幾果縱火焚浮橋劫江澣城有備不得入舟出定海以行制置司改宣撫司復署爲參議人心危疑旁郡邑相屯堡未散舊不快意於衣冠者爭上變入爵參議官陳允平素與王姓讎讎言新從福州航海來見陳參議爲書蘇都統約以九月乘颿下慶元當出兵以迎又言禮部尙書高衡孫而下三十餘人皆聯署勸進時張元帥督師將征南命招討使王世強圍捕鞠實公儒服立庭所見王辨陳參議與聯署書實亡有招討故爲宋官寧知讎不爲虛言王未應有戎服長髯者將登階見公亟下拜持抱曰此吾袁侍郎詣王前曰傅海舊爲建康壕寨官承宣使阮思聰與侍郎巡城議列木柵阮言城廣不可守且木柵無所從得傅海答曰蔣山左右巨木可取撤近郊居民屋高下附益可立具使果欲守良無難阮故呂太尉姻戚怒將以軍律抗對殺海袁侍郎悟旨急叱海入獄明日杖海而遣之今不知侍郎何故立庭下海願以身贖罪王大驚具賓禮以迎且告元帥帥引問之故公言安反側定新國當絕告訐羅織翼日元

帥盛軍容坐府有告者復言奉化昌國某大家以故王爲名一從台州黃巖來一從海上來帥立叱去之陳參議亦由是得脫郡大疫具善藥以施死者給棺以殯後戒以爲常行之踰二十年至元十五年從趙公朝京師覲世祖皇帝天語命班秩宜高從行者一等將授總管以子幼辭乃授朝列大夫同知邵武路總管府事以疾不赴至元二十年授温州路同知疾作復辭公幼從王先生鏞學問戒以躬行爲持身本每授以言行編諸書公守而行之至是書陶靖節詩顏氏家訓爲一編以寄意至元丙戌歲侍御史程公奉詔徵士首寄聲起公公遜謝不敢當大德二年改授處州路同知命下而公已捐館實是歲二月十有八日享年五十有四先大夫性孝友事兄賓州如父器物田宅賓州所予者猶辭不敢受嚴州遺澤二悉讓兄子淡嗜好自建康歸卽獨處清坐嘗曰綺縠聲色非潤身延年佳物諸君何慕焉喜賓客終歲無虛日客去復具饌以俟不喜言人過或甚不能自重者猶覆護言無是事急施與家無長物嫁娶喪葬有不能舉者悉賑與之愛博而內明碩儒故官旁邑外郡俱館致教子弟嘗言吾交

游宜廣汎愛親仁勿爲臧否可也有客素依公調官京師願奉公文書以效勞久之客得官羣議咎客公以書慰之君果有得猶我之得客出書示議者乃止善尺牘琴弈諸藝皆過人不自詫褻每言沽名激行爲之良易然不可欺於心晚歲過郡土神祠檇侍行指謂曰吾言出諸口今得視神無愧自丙子來冠屨雜糅抑負不自振嘗開釋防漸而扶植之或利害不便必正色廣論絕其萌蘖乃止歿之日鄉里無貴賤老穉皆驚惋不絕葬在鄞縣桃源鄉慈溪奧之原元配史氏太師丞相忠定史越王浩之曾孫祖彌堅資政殿學士贈太傅諡忠宣考賓之朝議大夫直敷文閣荆湖轉運副使再娶楊氏世儒家五世入太學景定壬戌太學進士太平州判官 之女以宋明堂恩俱贈安人男一桷史出女三長適丞相史莊肅公嵩之孫似伯前將仕郎次適工部尚書余天任孫昌期前通仕郎次適資政殿大學士史巖之孫益伯前承務郎孫男二瓘瑾孫女四長適同知餘姚州事趙孟貫餘許嫁未行痛惟先大夫言履歷歷在人口耳蚤登膺仕將大有爲迄不得展究尙義勇斷施止於州里而中年泊然退靜莫

有知其意者不肖孤藐然嗣承懼歲月之久失於傳貽將益負不孝願託于立言大賢以求信于後世謹述歷官行事辱賜之銘而傳焉

先君子蚤承師友晚固艱貞習益之訓傳於過庭述師友淵源錄

王鏞濟南人侍御史伯庠曾孫由次翁始居鄞敦厚寡言幼師之精理學多錄言行教人不喜矯飾壬戌進士

張卽之參政孝伯子孝祥從子善爲頌語乾道淳熙事月日先後亡異史官李心傳嘗質之喜校書經史皆手定善本嚴州奉祠日相過從有絜疾語言清整待僮僕亦然書蔽其名書法之壞自張始特加太中大夫以壽終

趙汝楨善湘子爲宰相壻卑退自修精易象有易敘叢書可傳官至戶部侍郎晚歲以理財進用失士譽

李伯玉鄱陽人爲右司論事得罪後爲禮部尙書薦以政事可作劇邑將入政府卒

馬光祖婺州人號吏師改署佐其府性過急斷決無停滯一時新進效之鄉有

馬元演時爲仁和縣晨坐廳決事五百縣大治改官奏舉皆出馬公後爲衢州坐殺饑民罷

劉震孫東平人忠肅公元孫文清公之子魏文靖公之壻爲喬丞相行簡樞屬喬相與劉嘗言越公尹京政治晚歲爲宗正少卿兼中書舍人知爲諸孫署劾曰嘉定名臣某有孫敏材宜理瘠縣

胡太初天台人以清苦自檢治與處州季鏞同其父越公門下士胡晚始自言事見劉克莊所爲銘

劉黻永嘉人左史出治慶元于時奉祠山中以居鄉清修薦世號六士汪之林里人龍圖閣學士大猷族孫爲諸王宮教授守汀州晚歲十年不通時相書逮識樓宣獻公言出處大致不可易居同里巷貧益甚卒

應文煒奉化縣人精史學年六十始入太學蚤游江淮吳毅甫作相兄淵守建康不去應作書諷之卽謝事毅甫奇之招入相府不顧去史嵩之罷相猶子璟卿上書或言應爲輔史相諷所屬掠治應益忿然卒得脫癸酉歲襄陽降應言

世事已去先子官金陵戒母攜妻孥凡所言得失悉中

曹說侍講粹中曾孫父爲山陽佐死難幼絕董娶精易象數論語詩春秋皆有解多折衷舊說歲一再至易說爲里人所竊今不傳聞在松江儒家

王先生應麟兄弟中博學宏詞科爲翰林學士禮部尙書咸淳詔冊辭命皆先生所作著書有春秋攷逸詩攷古易攷通鑑義例攷困學紀聞玉海一百卷文集一百卷先子命桷受業門下十年

胡三省天台人寶祐進士賈相館之釋通鑑三十年兵難藁三失乙酉歲留袁氏塾日手抄定註己丑寇作以書藏窖中得免定註今在家

吳淞建昌人喜論兵爲建康參議數凌侮郡將賈相督師舟泊龍灣客謁不得入吳大慟賈奇之後入爲王宮教授累遷起居舍人嘗薦先子于陳丞相入南起義兵事不濟議降文丞相殺之

戴表元辛未進士善論策失仕歸里力從諸先生能古文爲金陵教授時與之同官家貧衣食葬喪咸賙之後留塾中有榆林集五十卷

黃震慈溪縣人以清介聞賈相知之守撫州兼本路提點刑獄迄不能合坐論去性不喜鄉里獨作書以所爲日杪一編寄贈

陳蒙鄞縣人國子司業墳之子善筆札治獄多探奇嘗疑之後爲淮西總領以浪用公帑罷貶建昌晚守温州夜別先子行益詭誕子孫散亡不可攷安劉汴人居鄞之小溪以詩義冠多士善清言三歷祕丞郎官素爲賈相客安以科目自持卒不得顯用

程鉅夫舊名文海郢州人今居建昌善鑒裁爲侍御史時奉詔徵江南遺逸首薦先子以疾辭所薦士皆知名多至大官今爲翰林學士承旨

謝昌元資州人淳祐甲辰別院第一守封州提舉廣東常平幼歲見劉文節公光祖能道蜀士大夫言行可傳錄言蜀中亡事甚慘僑居于鄞入朝爲禮部尙書

青陽夢炎西蜀人使李璿善機辯賈相愛之爲荆湖提點刑獄仕元朝爲吏部尙書多智

留夢炎三衢人事見國史晚爲翰林承旨焚香擇吉日薦先子于御史中丞翰林修撰汪漢卿與桷官翰林時言之趙與熹黃巖人篤實無城府睦姻族與先子俱爲史壻官京師歲一遣問官至翰林學士卒

盛夫金華人邃經學多本項安世氏丞相王燾薦爲太學博士後通判慶元梅應發廣德人與叔祖履道同補太學爲慶元教授習詞科卒不成官至太府卿喜抄書先世書皆傳寫

舒岳祥台州寧海人七歲能作古文弱冠謁吳子良吏部大奇之吳學于陳耆卿舍人舍人學于葉適正則以師道自任好譏侮晚歲詩益工官慶元時與之游後作書俾桷往事之

劉莊孫學于舒能文詞深沈善精思家貧無書傳五經能默與先儒合病廢卒樓慘宣獻公族孫精歷法言宋司天氣朔盈虛當改章法不可用未之信後授時歷頒言始驗館于賓州伯父家四十年日布算疑多財者貧老卒

應發孫參知政事儻之子父爲翰林學士時能代父書命後祕其父書不出好

博以蠱死

史蒙卿乙丑進士拙程文默誦五經其學喜奇說禮部尚書王公多傳授之卒以奇不合于王公

陳定孫參知政事卓之孫爲軍器監丞家居四十年歲奉祭祀必哭泣年八十餘乃終

余尙賓官至太府寺丞賈相入朝不得調孝友誠實鄉里交賢之謝翱南劍人僧圓志瑞州人俱能古文尙嚴簡象鬱不自舒困死

周密湖州人與陳厚韓翼甫李義山咸淳初爲運司同僚俱有吏才約貴日以字稱禁近俗名號陳能文端明存之弟韓安陽裔孫善持守李豪邁名吏壽朋之孫皆蚤卒周中丞祕曾孫晚歲以鑒賞游諸公微失雅道

葛慶龍南康人寓居四明僧舍精唐律詩酒酣能飛筆爲數百言然棄不復錄有什一集極精警游越卒

先夫人行述

嗚呼楠始生之七日已不孝罹禍于先夫人音容永隔無所容罪每侍先大夫嘗語曰汝生之年歲大熱丙寅爲火協于支干臨安居民繁湫坐地沃水猶喘息不得止茵席器案如執焦汝母體素弱一夕暴泄輒不可藥目光已離猶視汝在襍中復愀然曰楠來前念至是曷時可忘耶楠泣而記之又曰大父嚴州與汝外大父敷文公最相好伏臘治具悉相似商榷品目議論好惡無一不脗合汝祖母王令人史太師甥孫故於敷文通姻好益密淳祐辛亥八月敷文病瘳下嚴州日問疾敷文力疾言吾有二兒二女皆未姻願以穉女屬公幼子吾時年七歲汝母年六歲是月嚴州治幣問名閱七日敷文捐館嚴州歲時往敷文家撫汝母候筭期以主我中饋又無祿嚴州卽世景定辛酉歸于我史氏號大門伯父賓州嚴峻汝母屈意朝夕承候無替惰分至大祭盛服俟廟門陳器薦牲饌低首偃立終日不少動性絜靜無華飾從母廣國夫人爲昭化軍節度使謝公埜配貴家競侈異獨無纖粟模效每一詣親黨歸悉脫去鈿罍嘗言教兒嬰孩必蚤加訓整庶無爲父母羞余年少時習騎射必正色切磨或從廳屏

偵問所與交有凡近者卽掩被就睡明日徐曰先丞相家無此客先夫人少母張夫人所出張夫人生二女長適謝公先夫人旣卒謝公日迎張夫人張夫人不肯去泣曰吾一外孫曷忍去卒撫字見桷有室張夫人言外祖敷文方死時汝母坐牀下泣不置勸之食不食終日坐殯次不離服除一詣庶母房至嫁日始再詣別之家人莫有識其顏面者桷旣長舅氏軍器監丞柳州某言忠定越王淳熙中召赴德壽慶壽班孝宗曲宴問曰太傅幼子今何姻忠定謝不敢孝宗曰吾爲太傅成之是時崇憲靖王伯圭女方笄卽封新安郡主以嫁忠宣是生敷文敷文長外家出宰武康縣縣滿始歸里敷文言吾祖暨外祖皆真太師汝曹當謹擇婚對今甥已克堪問學慎毋忘外家敷文嘗言而母幼靜簡當有成竟迄不享年幸子在猶能慰吾意夫人諱棟卿字景華以宋明堂恩追封安人謹按史氏譜有舉八行者諱詔贈太師冀國公爲五世祖曾大父諱浩舊學相孝宗純誠厚德歷三公以太師保寧軍節度使魏國公致仕追封越王諡忠定妣貝氏封齊魏國夫人伯祖諱彌遠相寧宗理宗太師中書令祖考諱彌堅

資政殿學士光祿大夫奉化郡開國公致仕贈太傅壯歲尹臨安帥湖南多異政中令爲相歷年滋多太傅不復肯仕家居十餘年端平改元諡忠宣妣趙氏新安郡主封衛國夫人考諱賓之朝議大夫直敷文閣荆湖北路轉運副使少事丘文定公密以政事稱六爲郡太守贈通奉大夫妣王氏恭人丞相忠定魯公淮之孫妣葉氏恭人俱贈碩人丙寅歲冬十一月葬于鄞縣通遠鄉建輿之原卒時年二十有一後三十有三年先處州不祿懼體魄之不寧遂別葬于桃源鄉慈溪輿之原先處州諱洪朝列大夫同知處州路總管府事曾祖諱昇贈太師衛國公祖諱韶同知樞密院事資政殿大學士銀青光祿大夫奉化郡公致仕贈太師越國公父諱似道朝議大夫知嚴州贈中大夫男一人楠女二人長適丞相莊肅史公嵩之孫似伯前將仕郎次適工部尙書余天任孫昌期前通仕郎先大父晚得女一人適資政殿大學士史巖之孫益伯前承務郎孫男二瓘瑾孫女四長適同知餘姚州事趙孟貫餘許嫁未行科念楠孤苦不自振擢揆厥有生與先夫人違棄之日俱積今宰木已抱過庭之訓懼無以貽子孫

敢求偉於文詞敘而銘之庶得以永考而有傳焉

亡妻鄭氏事狀

亡妻諱某姓鄭氏鄭爲明州令族世家于鄞始自元祐舉進士至宣和時其孫入辟雍有諱某者當孝宗時爲郎曹守平江寢著至太師尙書令忠定魏郡王諱清之以舊學相理宗官簿益盛故君之七世祖至高祖皆贈太師魯國公魯公長子某國學進士贈中大夫妣邊氏封太碩人魯公配臧夫人素嚴忠定之生夫人將不舉邊氏亟詣姑取保乳之長歸于其姑後碩人生子諱某與忠定同登嘉定丁丑進士第邊碩人卒忠定爲之服衰以報其子亦官至中大夫祕書監寶謨閣待制以終於君爲祖贈正奉大夫妣汪氏封太碩人待制生子諱某朝請大夫直祕閣主管建昌軍僊都觀於君爲考妣汪氏封宜人淳祐中忠定以師臣再相年益高祕閣入閣承侍裨贊可否務總約體要纖秒不以類于時賈相帥京湖數張皇軍旅邀國用朝廷抑不下賈相恨議由公出辛亥歲丞相薨庚申賈入相由是積二十有三年不復出仕先處州由太社令奉祠里居

祕閣公多能言臺閣舊事數往還是時祕閣新喪子無他嗣庚午歲乃得君客至嘗抱立左右錦襦珠鬘注目不聽去處州戲曰他日願以爲子婦祕閣愀然若有屬癸酉歲處州通判建康府將之官宜人與祕閣錢飲于中堂共指桷曰誠宜爲吾壻是歲祕閣與宜人俱捐館居第在城東門外乙亥兵難作先處州以其遺言謀于其宗長始歸于我于時袁宗猶完盛先廟祭祀姊妹姒林立能卑順盡禮朔望承問無缺怠事桷外祖母張夫人甘柔涼燠調適以宜張夫人嚴整語相家內儀和珍組絲皆精巧有度君能耳受目悟而敬成之張夫人病革視藥膳連月不入寢處嘗曰新婦不獲事先姑得事夫人斯可矣性靜厚寡言笑遇事不輒發而是否瞭然不能易故處親黨無閒言處州幼撫如己女君偵顏色承事幾二十年絕纖粟忤意己丑城中災遺物散燬先處州以宅事往吳杭間意忽忽不樂間治觴具能使如平盛時祕閣所後子不自振君深憂之竊從招提命所子歲時以祀其先大德戊戌歲正月君產女病榮弱桷主史甥姻于杭二月十日丁卯亟歸視之則已不及矣大禍仍構又八日而我先處州亦

捐館舍噫念昔少時私欲奮勵學問以自振植先處州愛之乃悉總攬酬酢俾不以亂其心不幸志昏能薄一無所成立四女二男皆君所出紉箴訓飭復能相其夫使有所不知及今一十有七年從宦京師藐然孤身若忘其家缺內佐之助靡密總錯日益加多而學益以落文誠不能以表君之志敢求於故家之友人精於言詞者誌而銘之君葬在鄞縣桃源鄉潘奧之原男瓘次瑾女一嫁餘姚州同知趙孟貫餘許嫁未行桷今爲翰林待制是爲先樞密太師越公諱韶之第四曾孫先嚴州中大夫諱似道之嫡孫先處州朝列大夫諱洪之孤子也

外祖母張氏墓誌

外祖母張氏諱致和湖州德清人嘉定六年七月生父某事趙崇憲靖王父子再世部樂伎年七歲通音律桷曾外祖母新安郡主歸崇王家見而愛之載以歸俾事外祖敷文轉運史公稍長爲待姬戶室靡密總覈合繩墨外祖性嚴急挈長覆短使不有忤意囊篋甲乙隨旨諭立陳于前如是踰三十年生二女長

和政郡夫人嫁太尉昭化軍節度使謝堃次卽先妣會稽郡夫人歸于我先考
諱洪朝列大夫處州路同知總管府事二女皆嫁宰輔家于時謝以后族貴顯
先處州官臨安常卑讓疏之外祖母雖久居相門見謝壻侈靡踰限制心不樂
而多留處州以靜恬自怡咸淳二年丙寅夏六月會稽夫人實生桷甫七日洞
下遽卒又未幾先處州病大熱垂死咸言不利於母將及父謝公願取己育之
處州在病搖手不許外祖母排斥詬詈戶之遂日訓飭調適且祝曰兒宜爲史
氏外翁自重八年謝公死泣曰吾固審若是吾盡力撫袁氏外孫他何之訖見
桷娶婦生女至元二十四年二月 日卒年七十有五葬于先夫人墓左

五十武幼通書算善心計處州事有未及始諷之終以舊事敷文者言之晚歲
病警纚纚言外家事曰汝外曾祖太傅忠宣公居東湖滄洲十有四年不復仕
作書諫兄忠獻辭相位不輟歲賜生日器幣辭一再始受後數年不復受鄭忠
定丞相忠宣公塾師也敷文受學焉其舊第前爲舊學壽皇書後爲授經鄭相
書皆有深旨又曰音樂慎勿蓄今世公卿女樂皆俚野不足聽惟太傅壻趙崇

王悉祖樂髓景祐譜調八十四穿心相通嘗曰譜與易合吾不知易何圖可合汝識之又曰丁抗掣曳大住小住爲喉舌綱領法曲散序忠宣刪正之曲有均猶韻也纍纍貫珠韻不絕也聲有盡拍以度非句斷也于時周待制邦彥孫璫於太傅爲中外表太師越忠定王嘗命譜清真詞手筆具在今付汝雖不解慎勿墜也舊以恩賜紅霞帔再封孺人記曰庶母不祀於孫而復曰祔于庶祖姑古不墓祭昔之大賢嘗慊然矣今夫禮緣於情而義以制者懼後之昵於私者之過也先王營丘壟之大小無貴賤慎其始不幸有沮洳崩齧之患焉其修之也必有道是則於吾外祖母非有過者矣以孤兒傳處州考其所自曰外祖母保鞠之恩重槨二子瓘瓘將竦然以加厚外祖母有田若干足以治墳壘奉春秋刻于碑陰懼瓘瓘之子若孫滅其情義必曰禮有所不載遂具昔之訓撫行事立石于墓俾勿墜某年某月某日外孫具官袁槨謹誌

清容居士集卷第三十三

清容居士集卷第三十四

元 袁 桷 撰

傳

徐師顏傳

徐君諱師顏字子愚遠祖天聖間由太末徙新定故所居里以氏得名曰徐閉君始生時蓮出並蒂父母器之稍長讀經史心徹意領年十七授室君白大人當令兒從師外方乃游三衢習進士業入宋太學程試甲乙表流輩性倜儻急難歲饑日具釜鬻滿庭廡值父喪慨曰世俗飯僧爲冥福吾當活餓者以報親是歲就食者幾萬人太守楊潮南書以勵旁邑至元十四年詔用兵入南俘虜日繫馬尾疲弱棄道上春大疫饑民旁午君出粟募民舁骸坎瘞可醫食者親撫視以活遇一女子扶曳蒼然氣微屬問之曰吾三衢儒家女命載以歸稍長俾爲士人妻客方達可館于君死已飭斂具其子辭不能行卽指某地葬焉復嫁其孤女事繼母至孝一日妻治紉澣出微語君聞之自責不居內者幾月母

言亡是叱妻具簪服拜堂下始復初外氏族黨嘗質田歲久君東券母前願奉田以償其承順率類此始爲信州教授首言于郡復儒役七百人署所居曰道悅以奉母會母思歸卽解去湖南缺提舉官集賢章舉之辭曰母在不宜遠游受湖州乃歸秩滿視資當入縣佐君言昔爲太學諸生中繩墨始得郡博士博士古官何縣佐爲復授太平路教授所至必先新學宮嚴餼廩安定胡先生墓浮屠氏將夷圮之君力復而致祀焉在太平時治丁蘭王祥諸祠墓於仁孝殆天性待諸生穆如也晚得末疾卒時年七十有四曾祖某祖某子男九人觀先卒頤爲族弟仲龍後艮革爲長興州教授節處州路教授益晉葦復未仕女二方丙子時游騎入人居大索二女爭死之孫男二十人女三曾孫男女三人所著有上饒集吳興集姑熟集北游錄凡十卷大理卿陵陽牟公序其詩曰事親若徐積詩亦似之其子革留京師將歸泣言于袁桷曰先人力詩書宦不充其德遺行又泯遏弗表見革等何以自樹將乞銘于翰林學士廣平程公以表墓子爲之傳藏于家其可乎乃弗敢辭

贊曰周官以鄉三物教萬民任恤之道戰國而降挾持以干冀幾於靡矣若徐君者不翕翕以近名禮以爲防恬然孝謹彌老益安子孫滿門歿猶有稱旨哉

蕭御史家傳

公諱泰登字則平姓蕭氏遠祖由唐末遷長沙占籍廬陵太和縣代有吉士曾祖諱逢辰官至中大夫當開慶間以安撫使副守鄉郡兵至卒急羣議撤近郊民居爲清野大夫持議不下城守兵去里人德之晚歲築宅一區立田八百畝聚其族以教厚德衍裕生德安府觀察支使諱安中稱其先猷蚤歲以亡德安生中順大夫瓊州安撫副使諱元永玉雪矜謹個儻自榮是生則平方幼時頭角嶄異九歲入鄉校治論語義屬筆精警稍長忽自悟儒以道得名事物險易當品節中理齷齪翦無益也弱冠試吏調永豐丞永豐多盜區跡巢穴僂之丞以治稱入京師授湖南儒學副提舉振直士氣使治靡密者不敢撓部使者徐琰奇之言可爲御史府屬會徐爲中丞亟力言遂僉廣東道提刑按察司事廣東介絕嶺海幽篁深水蠻獠縱恣郡吏私表裏聲言獠不可治白日剽劫子

女財物公贈遺良吏清謹者皆避讓郡縣多版授官姦宄馴積莫問使者循行擇善地坐歲月卽去至則躬歷所部劾治與僚相根蒂及積貪濫者八十七人皆罷之減始興貢銀之半疏其可宜行于臺者凡二十便事廣東民由是知朝廷有犯賊律焉初至廣時謹言僚寇入境亦欲以是嘗試一坐大驚徐曰督盜守令職署舍在是卒有警我輩何自卽上馬出境軍將爭率兵以進僚乃退是歲至元二十八年天子下議羣臣言按察官糜爛不任職更名曰肅政廉訪司遂以舊職解後新使者及御史咸言肅按察治事纔二百日所論按皆引直當法不宜以舊官同罷牘甫上御史大夫書牘曰須選用元貞改元成宗卽位罷兵安南釋陪臣陶子奇歸命李衍爲禮部侍郎奉詔往使之遂拜兵部郎中介其事明年二月入安南世子遣僞署官曰太尉迎詔空首不至地因問何得爾僞太尉曰國世子未至不敢先以黃蓋二皂衣數十人清路入館世子髡首跣足率從吏百餘人至館門前問聖天子起居卻立曰主上新卽大位二使者辱入敵境道里勞遠秋毫無所取誠切感抃敢昧死願聞明詔大意侍郎目郎中

郎中前曰昔乃先王先諸蠻款附朝廷錄舊功將錫宥于汝小邦汝曷敢不祇畏畏克敬乃不墜厥命或少縱自恣天憲速罰弗敢追宜肅恭盡事世子錯愕唯唯越三日備仗奉綵輿率朝服數十人導詔從褥道中行入其官世子後從二使者授詔世子拜伏讀詔興稽顙曰小臣不自意獲寬大如是復命再拜遂定慰賀皇帝皇太后皇后表牋貢物儀注成禮乃還道由思明時思明帥言石西州祿州皆本朝地爲安南所侵幾二百里彼詭言山溪蠻阮盞出沒不相統虛文歲往來無益至永平寨寨故宋戍兵遮道言實安南部領侵撓不得耕耨回首語陶子奇山溪蠻誠所屬奚號令不可止今已目覩當語而世子子奇不能對至是復命歸地蠻吏上下顧吝遂言吾非以侵疆來石西地不足輕重設奉辭致討汝何以自洗各屏息一日盡歸侵地故右丞相太傅公時治湖廣省聞復地亟喜之爲設宴以勞凡安南所贈遺悉返之明年遷連州又明年改爲江西儒學提舉儒者用廢已久新舊持短長科舉律令交排鄙不中節至則擇知名士禮致之導誘後生斟酌可能行者爲繩準省檄慮囚有巡官及富民殺

人誘傭奴以財俾自誣伏獄屢閱無異詞徐跡處所及所持刃亡有獨引囚曰若是汝當死咸款實得出會詔使按問諸道守令治狀使回丞相問官吏孰廉

使以儒學官蕭泰登對四年僉嶺南廣西道廉訪司事海南都元帥色徹肯

松年

案舊作
薛闇干

聲燄震海上多所爲姦利不法立具章劾有詔雜治抵罪覈殺無罪七

人焚掠村堡二十四奪私沒奴婢六百七十五雜畜三千六百五十五過柳州

出妖民誣註者百三十七凡黜吏二百一十罷攝吏四十一六年進奉直大夫

江南行臺監察御史分守江浙行省會歲大饑吳流民扶曳滿道已定議出官

粟守法吏言非朝旨不得擅語曰民命在旦夕後有詰責已捐貲以償何害爲

行省吏牘積糅叢雜首尾銜絡搖手莫敢問時已得疾呼掾史詰難視罪輕重

悉坐之又別爲副書筆其事使後毋有出入羣吏大驚是歲八月疾漸革趣治

棺斂手書屬其子語侍疾者勿宜受贈賻遂登舟不復言卒時年三十有八歸

葬于其鄉螺岡門外配楊氏繼彭氏子男三文孫憲孫昇孫女三大夫天性明

爽閱具獄率不爲吏蔽探情傳意多所出活非曲假恩貸以自異重然諾容采

精綯達官大人皆傾耳與論事或言大剛必折徐正色曰今世士無有剛果折何憂也長子文孫靜專自修留京師授翰林學士程公銘俾爲家傳念與公同年生相後纔一月薨薄不自振然職在太史筆削傳信惟謹乃弗辭

贊曰大江以南號多公卿比數十年闕焉無聞者何邪官御史府斬斬五六人或以激毀或以慳譏獨蕭公精謹自持正靜益明物莫能逃守儒知通据法不阿使參錯天下三年可成也年不衍用名益以昌何恨焉

史母程氏傳

嗚呼余嘗得三卯錄讀之蜀禍之慘誠忍言也夫朱禛孫之死而復生也蜀民就死率五十人爲一聚以刀悉刺之乃積其屍至暮疑不死復刺之禛孫屍積于下暮刺者偶不及屍血淋漓入禛孫口夜半始蘇匍匐入林薄匿宅所後出蜀爲樞密使嘗袒視人未嘗不泣下賀靖權成都錄城中骸骨一百四十萬城外者不計嗚呼推是考蓋可悲也蜀眉州史氏由唐吏部侍郎儼從僖宗幸蜀因家焉其先墓在青神將二十世宋世號名族其出蜀也今唯居湖州一房讀

其遺事益悲之史母程夫人蘇文忠公之母之族也夫人將攜其家下峽江以橐金腰纏之兵暴至伏林莽與鄰嫗謀曰輸金果可生吾兒無資不復能出蜀史宗誠無噍類矣縱得生旦夕兵復至亦決死均死死以全史兒誠不恨嫗見身死爲吾出腰中金告兒使速走須臾兵果執母謝以實亡金遂遇害翼日嫗語于鄰告史氏兒兒年甫十三從草野得尸如其言窆以歸且亟圖其象識曰史光母年五十有四嘉熙二年十月二十有七日申時死兵難兒遂東南來占籍湖州刻意自奮以右科爲浙東兵馬鈐轄鈐轄生子圭文嘉定儒學教授嘉定生子台孫某台孫儒術通吏文復有子幾人而史氏由嘉熙至于今且四傳矣噫蜀由秦帝入中夏至于宋凡一千五百餘年文物大盛絕不知有兵革一旦掃削殆盡迄今百餘年遺墟敗棘郡縣降廢幾半可哀也已可哀也已贊曰婦人內德不出門房中歌廢戰國而下俱不幸以著非得已也諱莫甚於死從容反復烈士猶難之况士女乎歐陽公傳斷臂婦人以愧馮道夫人以死傳宗承平世澤於是乎見作史者烏得廢諸延祐七年十月壬子前史官會稽

袁桷撰

孫孝子傳

表厥宅里首於唐虞若是則失其本心者見於上古歟司馬遷傳貨殖滑稽或者譏其有激五典爲治之本捨正而求異於世道何補焉晉唐作史始立孝友勸勵後世靡然嚮風深有取焉孫孝子楫字濟川世爲保定雄州新城人幼倜儻讀書通大義其喪父也遵禮而不瀆後調宣德尹慨然曰吾惟母存何仕爲不踰月謝去事母以上壽終而歸于田野者凡十七年兄蚤喪奉嫂彌謹卒爲兄子授室姊贅李氏于家二十年將異居營近市高燥以奉姊姊大慰喜錄其孤有成性重然諾不自表襮有故人喪至日將葬適以故不及送抵暮促騎以往夜已分一家大驚其待友也有挂劍之義焉其居鄉隱約自持鄉多宦家絕不通問鄉人咸曰此孫孝子居也卒上其行于朝表其門閭始爲燕南府史錄事襄陽繼授宣德由宣德名始著調興和路經歷改河東憲府屬又調濟南卒拜監察御史今爲浙東道廉訪僉事其行事不阿多可紀余獨著其孝行於父

母兄姊朋友兼盡故特書太原郭幹卿嘗曰孫濟川少歲能以其妻奩物償父兄逋一難能兄無子買妾以奉二難能郭斬許可今考其行信然

前史官袁桷曰曩在史院時嘗纂次世祖以來功臣列傳考實錄所著旌表令尤諄切至作隱逸孝行訖未有章灼篤實可以詔後世若孫孝子允其人哉

韓威敏公家傳

公諱政字君用姓韓氏高祖諱天麟知金臨潢府有惠政民祠奉之卒葬城南因家焉曾祖諱垂高州節度妣李氏祖文卿知耀州妣孫氏貞祐避兵南遷臨淄今為益都人父松之膂力善戰四駙馬募兵南征與之俱至下邳主將奇其勇俾率益都兵戍山陽戊子歲攻宋揚州歿于陣公時年五歲妣劉氏挈以家山陽明年益都為皇元所破淮南城守爭遁去劉氏走奔莒居燧火山劉母家沂州其舅業醫命習之盡得其術復遇一醫由是益精稍長猶隱醫以自活山東連歲大擾入于汴復歸臨朐又復還青社時甫弱冠見叔父順始得拜淄州諸瑩乃復從軍取海州掠東海破漣水皆在功簿達春

松年案舊作塔察

大王鎮遼東

召以公從至于龍庭與議事不合卒以其嘗所計畫者告于世祖皇帝遂悉以邊陲大事委之至元十三年討西羌姜衛

松年案舊作相威

國王領兵卽授嘉議大夫

漢軍元帥監軍事佩金虎符軍中大驚曰監軍非國姓不得領裕宗在東宮心

亦疑會入辭命以鎮庫弓挽之彀而復引者三始曰大帝善任使若是賜金錦

衣一以行西入大磧斬馘凱聞還軍至臨潢得拜祖墓其碑記猶在十五年立

五衛首授前衛親軍副都元帥指揮使復兼領左右衛屯田軍馬紀律整遏卒

莫敢譁奏以屯田各歸于衛而治其無良者則諸衛各有統屬上從之秋繕修

大明殿以治具稱十九年加正議大夫充樞密院判官二十年進治書侍御史

二十三年改淮東道按察使善決事有拾遺者告于其所失輒誣以金公遣拾

遺者而叱去之商人暴死于旅邸疑邸人殺之驗其嗜炙有毒邸人得釋其餘

行事往往與傳記相合常出能吏上薦士十三人率致位通顯在御史府定議

盧右丞牟利罪卒流徙之二十六年卒于官年六十有六葬于某鄉贈嘉議大

夫□部尙書上輕車都尉南陽郡侯諡威敏娶孫氏袁氏石氏殷氏男八拱承

珍做宋版印
務郎廣州路增城縣尹次振搏奉政大夫慶元路昌國知州拯御藥院副使次
撫皆蚤卒次揆扶持女十人孫男若干人搏之治昌國也與儒學建三皇祠嘗
紀其美績且命作家傳讀其隧碑襲慶趾嫩有自來矣

贊曰貞祐兵興中原士人無噍類獨臨潢以遺愛祠葬茲土三世牧守至於曾
孫死事有光威敏是承北省臨潢南保臨淄難矣哉政合古先不茹不吐子孫
繩繩宜哉

有元開府儀同三司上卿輔成贊化保運玄教大宗師張公家傳

公諱留孫字師漢系出清河東武城張氏留侯良之裔孫歆爲司徒歆弟協爲
衛尉生魏太山太守岱自河內徙清河七代孫彝徙魏州昌樂爲後魏侍中諡
孝侯子始均復諡孝侯孝侯生晏之北齊兗州刺史生虔雄爲隋陽城令是生
文瓘相唐高宗子潛揚州刺史揚州生宥爲杭州刺史始居江南至公十五世
今爲信州貴溪縣人曾祖宏綱集賢大學士光祿大夫柱國魏國公諡安惠祖
粹夫金紫光祿大夫大司徒上柱國魏國公諡康穆皆以公貴贈父九德太中

大夫同知江東道宣慰使司事累贈開府儀同三司大司徒上柱國魏國公諡文簡公兄聞詩學道龍虎山見而慕之遂服道士服以漢天師所傳授游江淮間儀觀頎整見者尊異咸願受其說有相者曰當貴極人臣而清奇絕俗視陶弘景葉法靜殆將過之世祖皇帝平江南召嗣天師宗演選公從行北方地高寒皆不樂居中遂委任其事門室清泊處之晏如也世祖祠幄殿裕宗入侍風雨卒至召見于上見其貌異常士而奏對簡異益器之風雨隨止遂賜廩給裘服俾歲從北巡上與昭睿順聖皇后駐日月山后疾甚召至命愈其疾若有神人獻夢于后遂愈上大喜命爲上卿鑄寶劍鏤其文曰大元賜張上卿敕兩都各建崇真宮朝夕從駕日昃命衛士提輿以歸內侍強登輿謝不受卽步出禁門十五年加玄教宗師授道教都提點管領江北淮東淮西荆襄道教事佩銀印明年奏復宮觀令自別爲籍有獻言者道藏經多舛雜宜焚去不錄遂密啓裕宗黃老書漢帝遵守清淨嘗以治天下非臣敢私言願殿下敷奏後上大悟召翰林集賢議定上章祠祭等儀注訖行于世十七年奉詔祠名山山川給驛馬

五十令訪遺逸以進敕輔臣設宴崇真宮復錢于國南門外回朝以所見聞劾于上上悉用之十八年七月皇曾孫生是為武宗上命擇嘉名以進是歲分翰林集賢院為兩道教專掌集賢始自公議二十二年仁宗生復召命名今二帝廟諱雖用國語皆以公名義釋之二十五年預議集賢院賜七寶冠金錦衣玉

珮珠履二十八年丞相僧格松年案舊作桑哥敗上欲相諤勒哲松年案舊作完澤下同穆卜之

得同人之豫公曰同人柔得位而應乎乾豫利建侯同人為得位豫為建侯彖傳之辭也陛下所擬為無疑未幾拜諤勒哲公為相後卒受遺輔政二十九年

開通惠河上問果便利對曰漕為國本孰敢議非是誠減民力取實效民必趨之由是河役卒不為民病三十一年上不豫遣內侍諭隆福太后曰張上卿朕

舊臣必能善事太子太子由軍中歸即帝位是為成宗皇帝成宗慕道家說戴祀彌盛在宥十年歲輒祠上帝侈甚祕祝御名皆上所自署後有白鶴翔雲中

命詞臣敘紀付史館元貞元年同知集賢院道教事大德三年加大宗師別給

銀印視二品上御便殿命講南華經七年上京旱兩京山西地震復命祠祝謝

曰祠祝實臣職祭不欲數地道主靜厥罰惟暘見於五行傳災由人興願應天以實布德賑惠臣敢稽首以請上深領之八年上御玉德殿賜玉冠爲壽十年制授上卿十一年興聖皇太后自懷孟還宮武宗卽位加大真人知集賢院事至大二年領集賢院位大學士上是歲再加特進時仁宗在東宮進講老子自是入侍必賜坐皇慶元年錫號輔成贊化二年命將作臣製玉刻文曰玄教大宗師手授曰以是傳教俾永遠延祐二年羣臣侍嘉禧殿上曰先朝備陟降持保無瑕缺者孰在咸未有對上語曰張上卿其人乎衆唯唯遂制授開府儀同三司號加保運四年以七十特敕設于其宮伎部畢列宰輔以下咸奉壽復命圖像鎮崇真宮賜璽文曰皇帝之寶命翰林學士承旨趙孟頫爲贊兩宮傳賜翌日入謝俛奏曰臣際遇累朝惕惕顧念罔有替今年且衰耄不去辱聖世願歸老鄉里卽死且不朽上不允七年英宗皇帝卽位遵累聖優褒禮再降璽書至治元年益求去十二月壬子酌酒會弟子少頃入寢室倚靜端坐以化斂之日顏色完好舉體如蛻羽兩宮震悼賻贈有加宰輔至于士類咸曰福人逝矣

傾城耄稚則曰善人亡矣皆弔哭盡哀及啓榭木冰載路觀者嗟愕始從日月山世祖卽命公爲天師卻立以謝曰嗣天師漢張陵之裔今居龍虎山願正其傳由自三十六代嗣師宗演至于今凡四傳皆公所匡翊美鬚長大癯然沖退不擇貴賤傾下承接奏告廣殿音聲激鏞鐘聞者凜竦賚錫無虛歲未嘗奉己屢錫田園以食其徒當至元末歲成宗新嗣位時宰不快於御史臺成宗是其言讓責中丞崔公或崔懼問策安在曰當見丞相釋所以遂與俱詣相府相怒霽又與同謁近臣言御史臺世祖皇帝建立專以懲姦慝勢尊則綱紀明削之則臺不能立矣近臣大驚入言于上明日大宴大明殿諭崔曰臺爲朕耳目朕曷不知憂卿等不職故告諭宜勿懼其盡心焉朕行爲汝增重矣崔頓首拜手謝其彌縫國體婉順若是至於排解薦助人不知所自亦不肯自以爲功絕口不言朝政貴客至爭短長酒盡三爵卽假寐客去禮復初暨喪還州郡縣接祭以俟今葬某縣某鄉祖師八人皆贈真人事在傳宗碑今嗣玄教爲吳全節授特進上卿玄教宗師崇文弘道玄德真人以真人佩銀印者三人夏文泳江淮

荆襄等處道教都提點曰毛穎達掌遁教事曰王壽衍領杭州開元宮以真人制書命者三曰余以誠領鎮江路諸宮觀曰孫益謙領杭州佑聖觀延祥觀曰陳日新承詔興聖宮以璽書命者九曰何恩榮提點信州真慶宮曰李弈芳提點南嶽廟兼衡山昭聖宮壽寧宮曰張嗣房提點潭州嶽麓宮曰薛廷鳳舒致祥張德隆薛玄義徐天麟丁應松皆奉兩宮崇真祠事其它弟子三十有八曰上官與齡何斯可彭齊年薛起東李世昌陳彥倫詹處敬于有興王景平蔡仲哲彭堯臣張汝翼馮瑞京祝永慶蔡允中張善式董襲常王國賓曹載靜余克剛丁迪吉張居遜董宇定王用亨張顯良徐守勤彭一寧劉若冲彭師尹張逢吉趙有立程某施某葉某童某倪某上官某李某公兄子榮祖弟子熙祖亦以公故入宿衛榮祖爲邵武路同知熙祖爲衢州路同知泰定二年今上召全節曰玄教汝祖闡立其爲朕祈永遂大祠于長春復追贈某官

前史官贊曰世祖皇帝闔一海宇蒐遺逸選藝能靡然踵來江南持政柄者不一二人卒不能善終何哉在御三十四年命相幾二十餘人或解罷或斥逐獨

張公無少疵病目覩成敗至于五朝難矣哉蓋其行無迹曲焉以全得老氏之旨五福斯備前古鮮著詩云昭明有融高朗令終張公其近之

拜珠松年案舊作拜住下並同元帥出使事實

至元二十九年今浙東元帥拜珠公奉世祖旨以行軍招安使從征爪哇于時

高王二將為蠻兵所圍公深入拔圍出之元貞二年奉成宗旨使西域哈贊王

愛其才以尚衣職行軍有戰功賞金符金帶因令其入見于成宗復賜虎符皇

慶二年仁宗以金印賜丞相孛羅且俾往哈喇班第松年案舊作哈兒班答下同王所議事

至中途遇額森布哈松年案舊作也先不花王疑有間諜執以問答曰今上所遣不過通

歲時問禮曷有他意王左右曰使者往來皆言有啟邊生事形迹汝此行宜得

要領可實言否則撈掠汝亦必言遂命跪大雪以問且搜其衣中無所有公曰

王所問實不知且王從何所得是議王曰阿必寶克松年案舊作阿必失哈下同至是嘗言

之且曰哈喇班第王上近支也吾等族屬存與留不可知後使者至必有處分

今汝往彼必生事速吐情以告我曰王擁兵遮道使者急求去多詭辭以脫阿

必實克曷可信左右曰彼統軍九萬寧肯不自愛惜詐言以求脫遂縛公兩手納諸股擊之乃曰有璽書具在使臣往來有後先拜珠萬死實不知取璽書視之始曰彼果無罪遂奪其虎符及丞相金印拘囚王所延祐元年王與兵內寇復遣使召公至獵所曰我已入汝境土矣公曰兄弟之國無內外彼地亦王地王往何所疑王曰親疎旣分釁隙已兆勢不得不爾公徐言在昔太祖皇帝西征有訓若曰人不可以信讒讒入則宗親乖離宗親旣離則百姓他適將貽笑於敵國拜珠嘗聞在成宗時先王有盟與滅國開關塞以安百姓今言猶未泯絕使者掉舌生異同令王致疑拜珠等良不稱職敢叩頭死罪以請王解顏曰吾欲遣汝詣上通好何如公謝不能時有不內附者梗於路遂罷行復以公往昔拘所未幾王薨延祐七年弟怯別王立王召曰在昔先王嘗遣汝詣上前後不果汝今宜以素所具奏者以聞是年秋入朝上曰太祖造邦孔艱惟和好惇敘則宗支允寧汝其以元帥職名乘驛諭朕意王旣受上旨拊膺謝曰疆宇寧敕自此始汝來何遲也對曰使副有疾在道故不得速進王曰來旨極善使他

人來吾亦不若是深信大較使臣多擅增減致啓邊禍公曰拜珠來途中聆逃人言且云復將有兵變拜珠寶不信懼王惑其言而行人之言不得信于上是爲虛行王宜孰察善計慮拜珠不敢他引古事爲比維昔定宗皇帝征把禿王有滅國真薛禪使者諫罷征嘗喻太祖得國之本明配日月量侔江海合天地之大德故能混一海宇滅國真薛禪死已久拜珠不才願踵其策以獻後王從公言奏于上訖如約以平王遂遣使收兵四境而少尼其行且曰邏者猝遇將害汝遂設宴三日給符信護行俾歸于朝至治元年三月抵上京入見于上而王亦遣使奏拜珠兩爲行人不愛其身隆爵厚職所不吝然除拜非吾所預爲語朝廷大臣善奏於上使得享至樂建牙纛爲諸侯表得矣是年冬丞相拜珠入奏嘉禧殿具以功簿言乃拜中奉大夫浙東道宣慰使都元帥官旣滿類集行事俾楠爲奉使事實云

前史官袁楠曰太祖皇帝經畫區夏以磐石宗牙於龍興絕域之地四履奠安盛矣夫疆域旣廣詔旨上意傳諭失實則時致疑爭拜珠公間關險阻百懼

不撓義正功倍以數百語解百萬之師非精白一心曷底于是計勳上多卒稱
其職俾後之爲人臣者益有勸焉

清容居士集卷第三十四

珍做宋版印

清容居士集卷第三十五

元 袁 桷 撰

內制

昭憲元聖皇后諡冊文

德合乾元母儀正而宸極立道參泰治王化基而國本寧靖思保佑之功宜慎
欽崇之典有嚴祔禮爰重尊名欽惟太皇太后陛下淵靜體仁齊莊秉度憂勤
潛邸清謚治朝內教洽乎宮庭懿範著于海寓實生二聖光于前聞用貽沖人
纂茲丕緒方將樂怡愉以承至養率恭儉以挹太和痛鑾輿之莫旋儼珠衣之
如在謹遣某官奉玉冊玉寶上尊諡曰昭憲元聖皇后伏惟靈承顯冊陟配宗
祧錫羨家邦永延祚胤

英宗皇帝諡冊文

瑤圖纘緒神已御於鼎湖玉冊揚休禮宜陞於太室悼降年之不永儼立政以
如新爰述徽猷以傳信史欽惟皇帝陛下文明天縱剛健日嚴辨姦邪於嗣位

之初彤廷祗畏廣儀注於治朝之際清廟肅雝絕封敕以杜儉人申憲章以勵多士罰茲無赦令必惟行君臨三載而有成知周萬物而莫隱豈運逢艱否大命靡終然號謹追崇尊名是著謹遣某官奉玉冊玉寶上尊諡曰睿聖文孝皇帝廟號英宗伏惟炳靈有赫歆格無違祔于新宮以妥以宜

皇后冊文

皇帝若曰在昔正始之道必先內治予以奉承宗祧化成天下朕嗣大曆服祗循憲章宜資配助用彰位號咨爾皇后淑慎柔嘉遵道是行輔佐王邸謙抑自持實生元子國本斯建興龍舊鎮介子紹封粵若臨御之初贊畫計慮厥相維多正位中宮天神協祥今遣某官授爾玉冊寶章坤順承天人道攸則表正母儀萬方是觀惟躬儉節用則徽音是嗣惟求賢審官則私謁靡干匡朕德格朕心實爲有賴詩書所稱罔專美于前代噫敬厥初終有慶尙其念哉以膺爾景

命

特命右丞相詔

帝王之職在論一相于以表正百司綱領庶績朕纂承丕緒勵精求治然而澤
有所未洽政有所未舉豈委任之道有遺缺與今特命中書左丞相拜珠

松年案舊

作拜

住 爲開府儀同三司上柱國錄軍國重事中書右丞相監修國史一新機務

使邪正異途海寓乂康以復中統至元之治所有便民條畫具列于後

云云

於

戲朝廷既正著端本澄源之功風俗斯醇廣摩義漸仁之化咨爾有衆體予至

懷

戒飭曲阜廟學詔

郡縣廟學崇奉之制所從來尙矣乃者大臣言曲阜廟學勅建聿新將嚴飭以
風厲四方朕甚慕之惟夫子之道行于天下崇教立化實始於魯可不知其所
自與有司其益加明絜屏遊觀嚴汎掃以稱創立之美敬而勿褻神明之道也
苟完以教夫子之訓也其盡心焉毋怠

閣阜山萬壽崇真宮加大崇真萬壽宮詔

朕慨慕希夷式瞻殊勝蜿蜒磅礴之所茲神必靈虛靜恬淡之徒其用彌廣睠

彼仙翁之化境曰惟江右之名區歷年滋多嗣教不墜形而下者謂之地茲實景山神而明之存乎人載加美號承天之大與國無疆

試進士策問

延祐五年三月六日進

制曰蓋聞昔之聖人垂衣裳以成無爲之治稽於書傳任賢設教品節備具諄諄然命之矣是無爲者始於有爲也事久則弊唐虞之世歷年滋多不聞其有弊也治莫重於定國體尊國勢綱常之分嚴風俗之化一國體定矣善惡之類明賞罰之制宜國勢尊矣廉遠堂高上下之辨也量才授官莫得踰越國之大柄也若是者其道何以臻此記曰禮樂刑政四達而不悖王道備矣夫禮以防民樂以和志刑以禁暴政以善俗四者何所先也夙夜浚明卿大夫之德也知其邪慝則知所以儆之知其困窮則知所以振之爲吏習常恬不知省其故何也繼體守文善論治者尤以爲難朕承累聖之丕緒宵旰圖治罔敢暇豫於變時雍若有缺然者子大夫觀乎會通酌古今之宜毋迂言高論以稱詳延之美朕將有攷焉

試進士策問

泰定元年三月六日進

制曰朕聞自昔聖王之治天下罔不在初政故舜之嗣位也明目達聰命九官咨十有二牧禮樂刑政之道粲然備具禹成厥功祇承于帝精一執中實聖聖傳心之要湯黜夏命以克綏厥猷爲本武王勝殷首訪于箕子天人之際明矣詩之訪落公劉書之無逸立政亦惟成王嗣服之始君臣交修以成繼志述事之業唐虞三代其揆一也維我世祖皇帝聖神啓運時則有同心同德之彥效謀輸忠故能混一區宇治化旁洽朕祇承丕緒永惟帝王事功見於經傳悉遵而行之時有古今制宜損益若稽世祖之宏規遠略垂統萬世夙夜寅畏以圖治安然人才之列於庶位者猶若未及治道之達于庶政者猶若未備子大夫其以前王之坦然明白可行於今者何策世祖政典之綱領當今未盡舉行者何事宜悉心以對以輔朕惟新之治

先農祝文

仲春令月原陸勸耕祇率舊彝以陳明祀惟茲艱食稼政允修相其陰陽迄獲

豐廡

司嗇祝文

春土方輿曰耘曰耔聿修耕籍庸薦常事維神功協先農種斂是司除菑布社以成善歲

太歲祝文

年熟於酉曷敢震驚儻功在初率循其舊爰立寢宇匪曰廣居尚訖相成以祈寧謚

后土祝文

至哉坤元以靜爲主匠石踰年寧免震疊寢宇畢治庸復其初敢伸揭虔克相終事

五方帝祝文

五行之用相須以成維神司之萬物以靈相彼土宇撓神實多引誠致祈勿譴勿訶

立皇太子告太廟祝文

列聖延洪纂嗣大曆國本聿嚴太后有訓親王大臣僉言允同日嫡曰長茲惟
主器將建冊命首告于宗廟

西鎮祝文

地道靜專載物惟職震竦失恆咎徵莫測側身內修秉德若惕慎其政刑爰別
淑慝乃戒輔臣香冊昭格籲復故常以底寧謐

司天臺祭告祝文

太陽

煌煌大明浴光咸池丕冒八表出震見離揆時朱明中街御輪體乾以行庶物
駢臻法茲照臨實予一人爰絜芬祀庸遂民因

太歲

歲行歸終福祿是惇四時秉權百神攸遵禮有報祈德用兆民時將平分兩暘
協宜綏此金穰物無癘疵

太衝 本命

卯爲春門品物彙滋受命自天集茲蕃禧聿嚴省方高明謹時大德曰生繫震是出順陰養陽罔敢暇逸肅迎元本多祜有秩

勝先

鶉火之宮司南秉陽時維長養品物用章繫月之恆儷日以光茲實命元受福無疆芳薦式陳莞簞錫祥

金星

金精呈輝配日後先遇伏斯晦厥用不偏清商助威睽睽導前爰庸預祈以相坤寧吉蠲匪瀆戩穀是膺

火星

執法麗天府承太陽曰茲羸縮厥有故常飭德省躬導迎景光陽居大夏翼翼靡違順軌合躔德馨是祈

土星

昭哉填星德隆倭遲燁燁中黃百穀阜滋斟酌元氣導迎丕基照臨元命肅將
以祈嘉薦茲芬留俞靡違

氏宿

蒼龍首東迤維宿殿界于卯辰靡有忒僭象緯或凌曰有成憲彼不順行曷敢
適從虔命宗祝監茲寅恭

房宿

巡狩事嚴百司靡寧率彼徒御興言宵征天星之精實爲準繩凌伏愆常推策
布程蘭席令芳祇迎展誠

心宿

布政于宮上稽明堂維茲日永法天以行五緯疾遲渾象森著謂數實然嗣服
彌懼祝冊致詞式筵菲具

尾宿

析木天津燕都所次維昔初基相攸塗墍民用不頗益遐以治靈臺考古庸啓

震悸善言維從式致芬祀

迎神

天佑丕基一誠肅將瞻仰昊穹紫微騰光龍虎森衛鸞皇鏗鏘降茲瑤壇八音
開張碧雲紆徐肸鬻斯皇

送神

靈旂歆顧靡亟靡遲敬天之休億載維期三垣潤明五曜逶迤玉斗宣光瑤壇
受釐懽兮如存脫兮若遺

楠木殿上梁祝文

揆時夏季維土居中百堵皆作震疊是恐百日以成帝令攸式棟隆之初以底
元吉

崇真萬壽宮設醮齋文

序推良月式符坤厚之光誠揭層霄虔致泰元之祝竹宮汎潔藥笈宣揚伏願
神御顧臨靈旂昭格玉衡齊政永綏有道之長寶籙延年誕啓無疆之壽三宮

悅豫四海乂安

青詞

天佑丕基肇啓乾元之始令行吉月於昭坤德之祥寅畏在初籲尊惟重伏願
監觀有赫敷錫無疆懷德維寧溥羣生而康乂以慈爲寶遂億載之怡愉

皇帝本命長春宮祈福齋文

獻歲肇春懋對亨嘉之序祈天永命式臨元本之辰矯首層霄延真殊館伏願
祥開泰治道合乾剛綏萬邦而致豐年咸躋仁壽錫五福而建皇極迄底雍熙

青詞

陽和肇歲宜與物以皆春元本建辰敢自天而申命籲尊爲大祇翼若初伏願
帝鑒不違神功溥運成四時之玉燭允協昇平展億載之瑤圖恪依覆燾

昊天上帝青詞

皇極建中密運生成之造玄穹垂象益嚴寅畏之誠禮謹祈禳功深保佑伏願
靈旂下令景緯順躔發政施仁迓丕基之永固側身修行迎嗣歲之嘉祥

崇真萬壽宮設醮齋文

歲慎省方爰恪遵於祖訓秋嚴報禮庸祇奉於玄科演繹瓊章敷陳瑤席伏願
靈旂昭假叶氣周流玉燭常調遂家給人足之願黃圖永固致兵寢刑措之風

青詞

嗣守丕基心靡違於寅畏導迎繁祉歲恪謹於修崇維德在秋自天申命伏願
祥雲開瑞景曜宣光怡愉永康受介福於王母清寧無斃錫皇極於庶民

皇太后爲皇太子祈福設醮齋文

天威不遠好生洽於民心帝訓孔昭受祉施于孫子誠深保佑禮盡禱祈伏願
颯馭肅臨雲輿駢集鴻圖鞏謐允諧載物之功燕翼綿宏永保貽謀之吉

青詞

正位宅中恪守成於祖武承天順則庸徼福以孫謀矯首叢霄傾誠璇極伏願
玉衡齊政金篋賜齡重輪重暉誕保無疆之慶有巖有翼永恢長治之規

長春宮散壇青詞

祈報聿嚴儼神光之下顧精誠允格荷帝命之密符蒞祿攸宜際蟠均慶伏願
歲成玉燭政叶璣衡孔蓋繽紛歸三千之寶所瑤壇馥郁拱百二之皇圖

興聖宮上梁文

旭日蒼龍聳帝京之積翠層霄彩鳳流阿閣之霏煙魏成少廣之居盛極東朝
之禮欽惟殿下道師清淨性合儉慈色石補天法女媧之妙用瑤池錫宴符王
母之長生穆如薰風之自南粲若衆星之拱北陛下孝嚴温清敬謹膳羞謂神
遊泰初當廣鬱儀之宇而養以天下益新長樂之宮庶民子來百堵皆作倚空
繡柱峨峨太乙之揚旌鬪角雕檐奕奕飛廉之奏舞彩宇周遭於禁雉寶華流
曳於驂鸞匠石繕完著龜告吉舉修梁於地上川嶽無譁成巨構於城中雲霞
得色敢伸善頌庸贊昌辰

拋梁東天雞初唱日輪紅漢殿瓊卮稱萬壽堯階寶扇擁重瞳

拋梁西三素雲扶鳳輦低閨苑碧桃聞已種廣寒靈藥不須攜

拋梁南薰風殿閣聳眈眈一色花光濃似酒十分松露滴如藍

拋梁北帝子天孫來侍側何須玉檢告昇平擬把瑤編增鏤刻

拋梁上仙藥輕調承露掌龍圖載見贊無爲魚夢維占歌有象

拋梁下女史未須夸鄧馬聖德重歌韓愈詩徽音願續周王雅

伏願上梁之後坤元光大鼎命延弘雲需湛露之恩德廣陽春之澤松茂柏悅

三宮同億載之歡鳳散雨濡九有順四時之序與天齊壽率土歸仁

皇太后寢殿上梁文

璇宮擁翠刻姑射之層山柏寢通雲儼廣寒之寶所凝神清淨協德順承皇太后
后養備東朝尊臨北極天純佑命握四時而品物亨夕以安身御六氣而陰陽
理寶典深調於玉燭珠星連緯於紫躔陛下禮謹家人孝行天下謂榮觀合老
氏之要道而廣居乃亞聖之至言令月書春惠風司律瑤池湧地龜吐瑞以成
形畫棟騰雲燕銜文而獻秀髣十二樓之縹緲開億萬載之怡愉工師肅給以
無譁多士懽呼而稱慶修梁舉地率土皆春敢集歌謠庸伸贊祝
拋梁東髣髴神君下壽宮絳闕雲光催曉日翠簾花影颺春風

拋梁西靈杵玄霜煉紫泥露下隄知金掌溼參橫坐見玉繩低
拋梁南咫尺天居接蔚藍底用麻姑擘麟脯共看帝子引鸞驂
拋梁北色石神功參太極物無疵癘樂豐年道合希夷超至德
拋梁上紫微鈎陳肅玄象五兵不試太平年三聖重光天下養
拋梁下內宴傳歡慶朝野遊魚漸識柳邊舟飛鳥時隨花外馬
伏願上梁之後乾清坤謐月穆星俞擊壤而歌阜康結繩以復淳厚千萬年永
清於四表九五福悉萃于三宮

楠木殿上梁文

天道不言而庶類亨式嚴居所聖人無爲而天下治爰法當陽坐朝知問道之
勤側席審思賢之念揆辰考室申令鳩工欽惟陛下守位建中施仁濟衆陋竹
宮之侈靡羞桂館之虛無宣室受釐未遑鬼神之間石渠論奏是資經術之明
掄榷楠以擬棟梁審律度以合規矩爰居爰處乃寢乃興歌庶民之子來形四
方之風動虹梁歡舉龜墨告從敢述輿情庸伸善頌

拋梁東一朵紅雲泰嶽峯絳闕翠旌浮曙色玉階星弁整朝容

拋梁西王母傳宣曼壽齊漏下銅壺催蜜炬庭傳丹詔擁金泥

拋梁南薰風殿閣靜潭潭帝子承顏催鶴駕宗王侍宴擁龍驂

拋梁北紫微熒煌儼宸極五兵奏凱一車書萬國來朝合圭璧

拋梁上玉燭金穰契玄象陽剛深法泰元尊至孝力窮天下養

拋梁下百穀芄芄滿原野淳風再使比羲黃雅樂重宣繼磬夏

伏願上梁之後乾坤合德日月順行高拱穆清景化溥霑於八表茂迎穰簡嘉祥均被於三宮率土歸仁與天齊壽

普慶寺後殿上梁文

積翠凌空儼諸天之層構側金布地成四梵之妙緣惟我皇帝陛下味道圓明宅心清淨深植善本靈山之付囑未忘廣種福田寶所之莊嚴彌奐像設參前而山立威儀殿後以雲趨一一青蓮層層貝葉爰以棲神而凝睇亦云澄觀以集思成祇樹園作平等觀虹梁將舉龍象具瞻

拋梁東瞿曇瑞世日輪紅一手指天呈實際九旬談妙演宗風
拋梁西雪山深處鵲巢低白足赤髭隨地見紺眉青眼倚巖棲
拋梁南要看彌勒與同龕擊竹莫參朝九九拈鎚且問後三三
拋梁北大地山河光的的平齊斗柄布王春深拱宵衣開壽域
拋梁上堯仁如天高蕩蕩八風不動太平年四時平分真實相
拋梁下川后山君擁風馬赤鱗白雁奏郊丘瑞麥嘉禾徧原野
伏願上梁之後後天不老景緯齊光玉檢七十二君同觀三脊金輪萬八千歲
共拂銖衣四海冰清三宮均慶

天慶寺佛殿上梁文

寶構凌空稱華嚴之富貴青蓮湧地成祇樹之神通雪堂老禪心匠虛明性宗
真淨住南城數十載名滿江湖祝北闕億萬年日巖香火雖紺宇禪局之已敞
而璇題祕殿之未雄靈山之法會如新黼展之綸音已下無踵而至不日以成
繡薨結飛霞稱由旬之龍象金波麗鳩鵲儼第一之人天爰舉修梁敢陳口號

拋梁東須彌初見日輪紅願上吾皇千萬壽銖衣拂石宴春風

拋梁西一朵紅雲映日低不用親遊天竺國只今寶所總菩提

拋梁南軒窗面面是瞿曇欲問拈花微笑意雪堂老子睡方酣

拋梁北殿角罽毼如翠織鐘魚解作梵王音日把心香祝宸極

拋梁上大雄之尊壽無量聖朝方是太平初白馬迎經踵三藏

拋梁下禪板蒲團不須假側金布地擬諸天香鉢如雲坐長夏

伏願上梁之後乾坤泰治日月恆新豐年調玉燭之和正法拱金湯之固兩宮

萬壽四海一家

天壽節致語

洪範九五福曰壽允屬至人上古八千歲爲秋實名治世仰天門之蔥鬱審雲
闕之青圜黃道日明式紀老人之次金莖露肅有開上聖之祥慶浹叢宵歡騰
穀旦恭惟皇帝陛下穆清居位剛健體元雷在地中消羣陰於旣長風行水上
示景命於方來辟雍建崇化之規象魏布新民之法以食爲本歸漕粟於中都

所寶惟賢卻貢琛於絕域方且端冕以聽古樂惡酒而好善言麴蘖相臣簫勺
多士瞻鳳皇來儀之瑞歌鳧鷖守成之詩克叶禹謨丕光周道某等伎陳九奏
曲合三呼蘭有秀菊有芳願敷宣於律呂月重輪星重曜行登載於歌謠遙望
天威敢陳口號

羲和御日上蓬瀛盛旦瞳瞳集壽星冠珮雲排朝帝闕笙鏞春響藹宸庭瑤池
已獻蟠桃實玉殿初開五葉棠要識吾皇清淨理長生瓊液養脩齡

清容居士集卷第三十五

宋史卷一百一十五

卷一百一十五

宋史卷一百一十五

宋史卷一百一十五

宋史卷一百一十五

宋史卷一百一十五

宋史卷一百一十五

宋史卷一百一十五

清容居士集卷第三十六

元 袁 桷 撰

外制

翰林學士承旨榮祿大夫知制誥兼修國史遙授平章政事閩復贈光祿大夫大司徒上柱國追封永國公謚文康

聲音與政通辭莫先於風雅易簡而理得治實效於乾坤維昔先皇歷選羣彥一道德以垂統嚴誥命以興文奉璋孔峨執簡有度攷諸遺老號稱名臣具官某學博而智周材新而意古山立陽休之儀表望重縉紳日光玉潔之詞華才工黼黻進揆臣而堅國是避政柄以守儒榮畫旨尙方密勿深符於上意澄清外服咨諏慎考於民風人物著龜典章衡石遽告休而還里終辭徵以養年脫屣如歸逝川滋遠噫德輿制詔早已類於人間居易詩文今果傳於身後載加褒恤式克欽承可

妻李氏贈永國夫人

魯侯燕喜之歌褒其令美敬仲皇飛之卜後將蕃昌事不偶然理難固必具官某妻某氏韞玉養德佩蘭襲芳規矩不出於廳屏律呂永諧於琴瑟守大家之戒靜慎而禮法自防誦季女之詩恪恭而祭祀有度命之不淑報也宜豐噫茅土並封亦既慰文儒之願玄堂同穴尙欽承人世之榮可

翰林學士承旨榮祿大夫知制誥兼修國史劉賡贈三代

曾祖深贈昭文館大學士資德大夫追封邢國公諡康穆加上護軍

泰山之雲起膚寸而成雨黃鍾之律累銖黍以立均德胚胎於前人澤膏沐於後嗣具官某曾祖某持身圭璧篤學巾箱清白儒科曩共誇於鄉黨丹青帝制今復見於階庭念昔干戈攘擾之艱唯汝詩書種殖之懿既開公社載廣王勳噫天勝人人勝天事果成於昭代子有孫孫有子慶永萃於一門增秩使藩疏恩冥漠可

祖肅中書左三部尙書商議中書省事致仕贈推忠贊治功臣金紫光

祿大夫大司徒追封邢國公諡文獻加贈上柱國

乾坤清夷真主昇而四海一風雲際會英傑出而庶績凝篤生股肱之臣能總
喉舌之職亶惟熙運爰立鴻勳具官某祖某學博而通方才長而守正讀易悟
損益之理觀文參忠質之宜中歲投閒卒起裴度於既老平居緩獄審知定國
之將興廟堂咨國是於著龜朝野係民瞻於柱石家聲允似子承曳履之榮書
種有傳孫擅掌綸之美用永厥世以等其功噫四世三公亦既推赫奕之懿一
門萬石尙毋忘孝謹之思可

祖母鄭氏贈邢國夫人

王臣外勞動資邦媛冢婦中饋訓立閭儀具官某祖母某氏佐餞靖共持家澹
素縑緗整比齊襟拱立於北堂錡釜絜蠲斂衽儼趨於南澗子先仕顯孫復文
榮噫沃壤再疏足示龍光之赫奕芳猷未遠尙瞻象服之委蛇爰詔後人式共
爾位可

父慤中奉大夫護軍彭城郡公加榮祿大夫大司徒柱國封邢國公

帝堯雍熙擊壤之民鼓腹漢文寬厚扶杖之叟厖眉念累聖之仁恩俾遺老之

壽俊具官某父某脫棄軒冕徜徉里閭誦讀詩書邈矣師承之舊陟降籩豆儼然孺慕之思壯年幹蠱以裕如晚節撝謙而泰定言追古往耄及意新種樹養生默合三槐之故事巾車訪俗有符五柳之曠懷亨嘉真磻水之師朝著仰商山之皓兒年希有世號少儔噫周公拜前益慎威儀之則韓侯受命毋忘僂僂之恭可

母彭城郡太夫人李氏追封邢國夫人

貴子而不及親施仁宜厚揚名以之爲孝報德是先禮有追崇恩推錫賚具官某母身同隱遯性一柔嘉蘋藻恪共於春秋絲麻力勤於夙夜執喪慟絕竟三日而始蘇佐餒懽違遽中年而長往是生賢嗣爰顯清朝噫翠輅魚軒亦旣極小君之寵蜜章鸞誥尙再疏下泉之思可

妻冀氏彭城郡夫人追贈邢國夫人

月圓而魄虧理或可詰劍成而神化物莫能推念茲偕老之盟言詎意中道而淪世具官某妻秉芳蘭蒞佩矩珩奉舅姑以無違處娣姒而彌度年之不淑

生也有涯噫鄉國大邦追錫永光於窰窰泉臺佳氣周流宜見於焄蒿可

妻廖氏封邢國夫人

相夫之道靜淑是師承祀之儀絜蠲惟謹故貴得以從其爵而教必先修其身
具官某妻執禮奉盈守德珮玉事舅嚴雞鳴之問逮下審桃天之宜噫小君實
諸侯之妻惟謙抑可以長保鉅鹿乃邢子之國惟儉素足以久安毋替戒詞以
底終吉可

集賢侍讀學士中奉大夫李侗贈祖父二代

祖懋河東宣撫檢察使贈嘉議大夫吏部尚書上輕車都尉追封冀寧
郡侯諡文惠

乾坤轉旋臣擇君而審事風塵膠鞮民俛后以求生匪資談辯之折衝曷得從
容而完聚昔有俊士聞于當年具官某祖懋沈鷲決機秋毫析理不背時而棄
利魯連感燕將之風能因危以爲功陳康歸蕭王之智按堵復鄉閭之舊開田
廣井邑之繁全逃民山寺之中沒猶有祀憐故帥孤城之守許以自新謂宜臚

珍做宋版印
仕之軒飛乃獨急流而高避菟裘嘯傲合難兄難弟之懽犢車雍容追某水某
丘之勝才不大用德遺後人噫維此冀方存憂深思遠之旨嗟爾孫子篤尊祖
貴始之誠賜履舊邦克昌胤嗣可

祖母張氏贈冀寧郡夫人

婦人內訓愈久則事莫可稽聖朝鴻恩雖遠而澤益加厚錫類者教民之本顯
親者繼志之基具官某祖母張氏語簡以嚴心靜而正斂容似玉家庭服其母
儀訂坐如山鄉閭師其懿德益昌爾後克底于成噫貽厥子孫不負窀穸之願
烝畀祖妣爰疏湯沐之封營魂有知寵光無斁可

祖母某氏贈冀寧郡夫人

孝治天下教必本於興仁惠及萬方禮莫嚴於尊祖爰念瀛洲之彥庸推下泉
之恩具官某祖母某氏韞玉無瑕服蘭有度采藻行潦雝雝承祀之顏殷霽南
山龜龜勸夫之義生子允才而不淑傳孫濟美而始昌噫一門同封聿廣聖朝
之澤三晉故壤足爲里社之榮垂世彌光終古奚憾可

父昱成都路防城軍民總管贈集賢侍講學士追封冀寧郡公

古澗長松宜棟梁而弗施於太室韞匱美玉器瑚璉而莫致於合宮維先朝宣力之臣皆一時成德之彥才不究用沒猶可稱具官某父昱沈思而好文敏斷而濟事地生天施知民悅以阜通城高池深審人和而環守蜀爲望郡職號劇曹足食足兵流馬相迎於道上爲物爲變飛鳧疑度於雲中天不以年子由之貴噫三牲之養榮親弗逮於膝前兩谷之間錫土有光於身後式嚴嘉命爰慰九泉可

母仇氏贈冀寧郡夫人

曾參風木之悲深嗟于身後孟宗冬筍之養得遂於生前事爲至難道無全美具官某母仇氏遵行儉素服習勤勞不見其夫之榮舜華隕露猶幸有子之似蘭茁承春肆衍褰嘉同疏追錫噫金葩錦囊益增玄宅之光丹轂文軒允過板輿之樂清朝展慶故里聚觀可

母韓氏贈冀寧郡夫人

孟軻五鼎之饋禮非有踰子路三釜之悲情何可既仕獲通貴者常有祿不逮養者何多具官某母韓氏家法儉勤母儀慈惠化治絲枲生兒承膺仕之傳恪共蘋蘩奉祀守吉蠲之度鬣封已拱口澤猶存肆推錫類之仁誕布昭天之渥噫黃河一曲千里茲實故鄉白雲孤飛太行有光前躅烝嘗不墜褻寵如新可妻許氏封冀寧郡夫人

君子偕老之宜國風所詠家人中饋之吉易象攸存作則閭儀來嬪瀛彥具官某妻許氏有諧琴瑟相夫之道無違不出廳屏教子之心彌切維靜以正既樂且康噫蟋蟀唐都合儉禮而民始化采蘋南澗循法度而祀乃修遵錫舊封祇承景命可

集賢大學士榮祿大夫致仕李謙贈光祿大夫柱國追封魯國公諡文正

祚衍皇圖上聖聿開其正統教與文治鴻儒允際於清朝四時周而寒暑成八音宣而律呂比道關運數天篤忠純具官某藻思夙新蜚聲壯著處身閭里蔚

然黃流之在中策名搢紳矐矣錦衣之尙綱早贊青宮之善迄編金匱之書疏
傳十事之簡嚴志遂四休之安佚碑板華夏辭累貫珠詩篇林泉語深挾續故
老倚之爲衡石諸生仰之如著龜大帶幅巾儼君實之在洛秀眉明目侔康成
之居鄉旣得壽以保終宜易名而廣譽土荒東魯爵列上公噫孔門設科先德
行而後文學漢廷取士首孝弟而次賢良舉世實難唯卿無愧可

妻孫氏追封魯國夫人

夷攷儒學之彥允資賢淑之妻從游外方米帛不干其念慮敦敘同姓籩豆式
謹其威儀古有其人今見于汝具官某妻某氏温恭秉度禮制飭躬相敬如賓
皓首不墜其繩墨有嚴教子青燈猶課以詩書惟小君之封用加矧大賢之忠
宜錄爰伸並命以慰九原噫起家而居有之惜未配夫宗之貴告往而知來者
庶永爲婦德之規於昭營魂哀對天寵可

禮部尙書中奉大夫元明善贈二代

祖海贈嘉議大夫祕書監太卿上輕車都尉追封清河郡侯諡貞惠

青桐孫枝之良雲和所植紫芝靈根之秀商山是宜隱顯之用有時報施之效不忒具官某祖某養真巖壑策名里閭試吏緩刑卒應高門之語抱孫奇骨可勝執硯之悲器卓犖以不羣量汪洋而莫測李翱之傳皇祖文已四馳王通之述府君事關百世禮嚴教孝爵侈勸忠噫東壁圖書爾尙詔後人之似故鄉湯沐益毋忘昭代之恩可

祖母高氏追封清河郡夫人

珠藏九淵神光燭而愈闕蘭生空谷幽香耿而自持通塞維時存歿奚憾具官某祖母高氏慶源演迤淑則和平種桑而望繭絲亦云勞止樹桐而中琴瑟夫豈偶然錫類者治世之湛恩尊祖者孝孫之美志噫爵書故里永爲粉社之榮稱曰小君益表松阡之觀可

父貢奉議大夫驍騎尉大名縣子贈中奉大夫吏部尙書護軍追封清

河郡公諡孝靖

種德如藝木必閱世而始昌保身若奉盈惟持善者無愧窮達有命幽明不渝

具官某父某孝友篤躬質直守道簞食卒安於簿領贏金始羨於縑緇不假以年益豐其報孝能繼志鬱成南陽之阡文以顯親行擬瀧岡之表肆加錫爵復舉易名噫丹詔疏恩天官實古之冢宰蜜章分土甘陵維爾之舊邦尙其營魂歆此殊命可

母弭氏大名縣太君贈清河郡夫人

孟軻大儒深藉斷機之訓仲由至孝每懷列鼎之悲審閭範之可遵愍堂封之彌遠具官某母弭氏孝慈有度淑慎無違禮行於家蘋蘩循沼沚之素教施於子斧藻爲朝廷之光已錫鴻恩爰加再命噫九原可作鸞書啓鄉郡之尊八座並榮象服稱小君之號可

妻李氏大名縣君封清河郡夫人

鵲巢起家之因實原勤儉燕喜受祉之美斯爲樂康報之原者始必勞持之素者終不懈具官某妻李氏習熟女史幽閒內儀儼服笄珈執沖謙而彌下恪恭籩豆盡蠲絜以無踰百祿是適再命而偃噫相其君子益知典禮之寅稱曰夫

人毋忘主饋之訓可

光祿大夫湖廣等處行中書省左丞相阿爾哈雅

松年案舊作阿力海涯

追封太

師郡王

四懸設樂必假鏞鍾之洪音八柱承天斯合明堂之巨構乾坤啓運川嶽降靈
是生非常之偉人以佐統一之真主沒且不朽德猶可稱具官某勇略致身英
姿蓋世羊祜平吳之策誰復先之楊素渡江而來何其神也據荊州以爲之根
本擣長沙以披其腹心兵勢建瓴皇威震電先皇帝知人而善任定功以行封
倬彼雲漢之章廷無儔匹享有金石之奏位班侯王兼將相之重權契君臣之
嘉會令肅風生於細柳政成人指其甘棠念耆定爾功實有資於贊助而大賚
於廟必申錫以褻崇彌深撫髀之思莫遂圖形之想白雲已往青史如新噫齊
岱爲鏜石城爲鋒朕已悉皇王之大武黃河如帶泰山如礪卿允爲邦國之元
勳詔爾後人無替先德可

妻某氏贈國夫人

鵲巢起家因以爲召南之首殷靄勸義足以成大夫之行矧江漢之舊邦昭柱石之偉績必資內助以佐高賢具官某妻某氏澹泊無華靜專有守良玉在匱襲中美以善藏幽蘭生林愛國香而自閔稟北庭之渾厚婉南澗之恪共方考禮以報功爰推恩而錫類噫西平有子足彰閫範之光魯侯令妻宜受國封之侈是惟崇德尙克歆榮可

太尉平章政事某特授太子太傅

朝廷大策慶莫盛於建儲社稷重臣禮尤嚴於敬故功參羽翼政倚股肱具官某秉志精忠宣猷惇實黃閣調元之始允屬謀謨青宮選士之初必先德義惟左右前後之人正斯君臣父子之道彰噫日重輪月重光宜益資於輔導書同文車同軌期咸底於昇平往堅乃心祇若子訓可

遙授平章政事某特封秦國公

亶惟龍飛之初考圖數貢爰篤鷹揚之舊崇德報功出命告廷分封啓宇具官某蚤乘熙運躬受真才絕北威名允著長城之助居中韜略密宣前箸之籌肆

予纂承委以輔弼噫干戈弓矢于以昭武功山川土田斯以彰異渥祇服明命益殫嘉猷可

中書左丞某封贈三代

曾祖某贈資善大夫中書右丞追封高昌郡公諡康懿

粵昔高昌肇邦藏經史以崇儒師立校官以訓子弟所從來久矣古其聰明才知通於聲音文字之學代不乏人具官某曾祖某誦詩讀書漸仁摩誼得於鄉里之素若雲在淵勃然以升蓄極而通至曾玄而始見疏封舊寓以報流澤之無窮尙其享哉可

曾祖母追封高昌郡夫人

諸侯之制立廟以五親服未盡是猶有待於後也今爾曾孫某勤勞王家錫之山川土田而汝與封推其自則由玄孫啓之先王之旨遠矣具官某曾祖母某蓄德不耀保躬益貞敷佑後人輔弼不懈曾孫之慶至于五世其昌矣今從夫爵尙承朕恩可

祖某贈榮祿大夫平章政事追封齊國公諡莊靖

赫赫在上永遵繩武之思子子爲孫爰述尊祖之義發揚潛德追錫愍章具官某祖某明珠媚淵良玉韞匱言寡尤行寡悔祿不願于旋中矩折中規動無踰則養真於攘擾之際味道於沖漠之初本碩枝繁源深流遠噫稽尙父之返葬咸謂分封仰周公之拜前允宜淑後載嘉正真庸受寵綏可

祖母追封齊國夫人

蘭長空林羞當戶以自獻珠生巨海懼媚川而深藏矧爲隱約之時曷表殊絕之行婦德永閱孫賢可推具官某祖母某孝敬行於家門肅雝傳於閭里念昔日艱難之際爲善是持至歷年磅礴之多與宗有驗恩分沐邑賚廣脂田噫綺繡冰紈莫慰生前之願文軒象服足爲身後之榮可

父某贈銀青榮祿大夫大司徒追封齊國公諡恭惠

大明麗天羣陰伏于部室寸雲出岫甘澍徧于寰區崇德報功之典存繼世象賢之制著惟勳是錄于禰有光具官某父某潛珍養名砥節礪行王明受福井

渫不食非所憂父教爲忠籛金之藏奚足羨事久斯定時至乃亨念爾嗣之弘
文生聞孫而佐治蟬聯朝著磬折里閭維積善之粹精宜流澤之溥博詢于集
議庸爾展恩噫泱泱大風知紹封而益茂謙謙終吉詔承德以靡虧可

母追封齊國夫人

積行累功允賴夫人之配承先共祭載歌季女之賢剛柔之道有恆倫紀之位
斯定具官某母某氏持守貞白衣被絜清子又生孫莫計堆牀之笏善必有慶
久高容駟之門議勳以褒蓋臣錫命而及賢配亶惟異數足稱營魂噫三服齊
官是在昔女工之訓五鼎廟食亦庶幾孝祀之芬旌寵有光歆承無斃可

榮祿大夫宣政院使領延慶使某贈推誠佐理功臣太師開府儀同三
司上柱國追封齊國公諡文忠

式觀景運灼考蓋臣際乾坤清夷之時承風雲亨嘉之會精忠儼在褒恤庸加
具官某慎慤而行方沈潛而量厚踐揚禁近官一品以益謙陟降邃嚴閱五朝
而彌著恕能及物廉以律身經文譯潤之功深開宗明義詩書服習之訓久教

子象賢維時輔臣佐我初政墳簾雅奏圭璋令儀蓋德厚者世必昌勳著者爵宜峻誕開公府庸正師垣儼精爽以如生合神明而無愧噫保茲青社斯爲胙土之崇封以紫泥益見蜜章之重體茲申錫期爾永承可

妻封齊國太夫人

馭爵疇功錄先臣之大節疏恩並命成賢媿之芳猷往莫追尋生宜悅豫具官某妻某秉心淵靜制行霜嚴悃悞無華佐餒唯精於五飯温恭有恪執容儼稱於六珈是生絲綸之英復得鹽梅之佐入室每諮於慈訓揚庭爰著其母儀噫誦齊風雞鳴之詩則貞女宜封於東土歌魯侯燕喜之頌則壽母益介於長年哀對殊恩恭承令祉可

資德大夫同知宣政院事某贈存誠秉德功臣太傅開府儀同三司上柱國追封齊國公諡忠穆

帝室興隆君臣交孚而同德王庭肅穆弟兄相繼以共爲睠若昔之揚休越今茲而錫命輿言是採卹典有加具官某植節秋霜持評水鏡侍元戎於漢上屢

奏凱功奉大帝於禁中益參聖諦凜有不可犯之色充然無自滿之心阿閣鳳凰虞廷屈軼績既昭於簡冊望宜冠於巖廊噫舉賢上功爾猶存太公之生氣慎終追遠卿勿忘人主之殊恩尙其冥魂享此休寵可

妻追封齊國夫人

王言惟作命揚于庭者爲報功內訓不出門宜其家者爲合德有嘉賢媿宜盡褻封具官某妻某秉德芝蘭奉身玉雪遠行江漢之域勸義不違深居房闈之中服勤無斃考圖定地錫命續綸噫取妻必齊蓋有資於大國從夫之爵今已謂之小君昭于幽局歆我異渥可

監察御史沙某封贈祖父母

祖某嘉議大夫行工部事專一修築宮城勾當今贈

功臣太

傅開府儀同三司上柱國追封某國公諡武敏

式考皇猷承命以永新邑爰立民極相宅以營成周輪奐彰施高深鞏固言念梓材之彥興懷棫樸之官具官某祖父某氣壹而靜專智圓而肅給順陰陽伐

材木構寶殿以如規議遠邇程土功儼金城之有截通四方而罔缺傳衆力以
聿成典制百工論道時趨於清切辨護少府使民每減其冗煩紫闈深教以手
書墨詔屢傳於宸旨亶惟際遇允協隆平覩設施而舊跡愈彰思典刑而老臣
彌重誕開公爵復廣社封噫召公之誥簡明命庶不作蕭相之謀宏遠俾後無
加追命煥章營魂昭慰可

祖母

女教勤閨門夫獲脩于六府皇恩洽寰宇死得慰於九原睠惟蓋臣成手良媛
具官某祖母某韞玉制行範金作程化治絲麻宛惜日稽功之效絜清蘋藻儼
承先盡職之能用施孝孫亦克王事方襄忠以大賚爰追命以並封噫蜜印昭
天益侈桓楹之表脂田廣國式崇柏板之巖茂對有光靈承無斁可

茶迭兒局使沙正議贈父母

父某正議大夫遙授工部尙書管領茶迭兒局人匠總管

漢宮密勿之邃彌重細旃周廷朝會之嚴用資陰羽省方維歲考古若今具官

某父某才敏而通時慮深而應變春秋蹕道環徼廬虎士以無譁風雨屬車望
帳殿翠華而有煥掎如鹿角整若魚麗曉籌爭奮以啓行夕頓悉安其成列舊
規儼在故老能言爰開大國之封式體先朝之任噫相王入大次禮猶想於肅
雖論道惟三公恩豈殊於冥漢詔爾後嗣祇予至懷可

嫡母

世官嗣業古罕其人工師致功今慎其職具官某母某肅著令德恪嬪大家上
承尊章察素絲五純之儉下訓子婦審狐腋千金之難爰俾象賢式克紹後噫
翟第崇貴已享偕老之時蜜章廣恩足慰厚夜之望子能謙謹汝預寵光可

生母

佐中饋之職必假婉柔成繼世之賢實資訓飭泉遇蹇而利見木積小而始升
具官某生母某勤勞大門光寵盛代象服之貴宗婦攸同鸞誥之榮鄉人所羨
爰相胤嗣益慎忠嘉可

資德大夫紹慶珍州南平沿邊宣慰使播州安撫使侍衛親軍都指揮

使上護軍楊漢英贈推忠效順功臣銀青榮祿大夫平章政事柱國封
播國公謚忠宣

繼世立諸侯審象賢之有託推恩保四海在追遠以彌加有懷蓋臣庸厚恤典
具官某著德遐域效誠先朝聰敏得於襁抱之初發于天性稚弱置於扈從之
側斷自宸衷用能絕黨殊鄰投戈納款尺天寸地負版奉圖先國後己之慮深
尊主庇民之績著闡學傲文翁之化好賢師鄭武之風雅量鎮浮方櫜弓而箠
矢澄懷味道時緩帶以輕裘出門輿折軸之悲行壘應流星之兆何以勸善必
也正名循故壤以加勳衍圭田而封土青綬崇副相之貴袞衣嚴辨章之稱噫
忠孝傳家于以顯昭事厥辟之實歿存錫命所宜推圖任舊人之終精爽有知
欽承無斁可

妻田氏遵義郡夫人加播國太夫人

婦人中饋歌采蘋則謹其承先大夫遠行誦殷雷則審其勸義禮有準則行無
過踰具官某妻田氏嬪高門之勳庸受外氏之經籍曹大家之女誠奉上克謙

魏夫人之僊書教兒能學念王事靡盬之際知女子有行之宜夙夜傳恭寒暑
循度噫從夫以貴今已位於小君勉子惟忠益有光於先正茂膺異渥式介長
年可

開府儀同三司上柱國錄軍國重事中書右丞相監修國史拜珠

松年案舊

作拜贈清忠一德佐運功臣太師開府儀同三司追封東平王諡忠獻

入柱承天棟橈萌於巨構六飛御日輻說見於中街愍死難以成仁攷生榮而
錫命具官某鼎彝王社閔閱相門自結主知應雲龍之異遇獨持國是炳著蔡
之先幾陳於上者不足言見於事者為可則斥聚斂之臣以靖四表誅黷貨之
徒以正庶官庫無餘財拔葵之訓靡替門絕私謁懸衡之鑒益公天下望其治
平朝廷以之模楷然盡言招過儉謀愈深選賢與能姦黨滋懼變成肘腋禍延
股肱川嶽動搖日月昏翳雖元兇正罰足明朕心在壹惠易名姑慰卿意分茅
故壤增爵維垣噫未明入朝竟墮承宗之計盛服假寐孰為鉏耨之賢念此盡
傷恩斯優渥可

妻某氏封東平王夫人

星坼中台輔弼之虧果應舟藏半夜伉儷之情曷勝死者易名生焉從爵具官某妻某氏素系相閥克嬪王門纂組之功弗訓以習祭祀之謹於禮無違偕老之志莫酬並封之恩宜厚爰增湯沐庸演絲綸噫司徒之妻問齊君以予邑蹶父之子樂韓土以相攸宜飭諸孤以保終譽可

太中大夫內史府司馬狄琮贈榮祿大夫中書平章政事柱國追封冀國公諡貞毅

山西諸將之英沈雄有自斗南一人之裔正直是傳爰產魁梧之賢以贊藩輔之政具官某少植奇節壯懷孤忠朱邸論思引經說以開導細旃密勿詢治道以彌縫挺然廊廟之姿鬱有江海之量才見於用知無不言邊陲以之救寧帷幄以之康濟朕纂嗣大曆圖任舊人方審象以博詢慨撫髀而莫覩興宗有似茲爲柏臺之羽儀追遠彌加庸進槐階之品秩噫呂望老而賜履實文王之故臣丙吉生而受封乃悼考之遺德事莫能偶恩宜有加可

妻張氏贈冀國夫人

遠行從政閔勤勞者著壺儀修身踐言循法度者執婦道允矣溫恭之媛疏其赫奕之封具官某妻張氏謙以自持儉而有守酒食是議春秋之祭無違狐狸爲裘風雪之需悉備旣嘗艱阻莫遂恩榮噫兼謨入臺紹祖之傳彌振僧孺清道思母之念益深尙其營魂承爾嘉命可

妻劉氏贈冀國夫人

展如邦媛典刑傳於大門咥兮國英謨謀見於藩邸天相其配恩與之俱具官某妻劉氏珩璜母儀纂組女訓如璞蘊石審玉人之琢磨若鳩在桑信君子之均一嗣爲烏府之模楷母增魚軒之寵榮噫繼世象賢于以錄先臣之舊慎終追遠庶幾彰盛世之光綸誥下頒營魂祇服可

清容居士集卷第三十七

元 袁 桷 撰

外制

太傅右丞相巴延

松年案舊作伯顏下同

贈太師開府儀同三司

功臣

淮陽郡王謚忠武

乾坤呈符構風雲之嘉會山川毓秀挺柱石之英賢夙奉宸猷丕揚帝訓惟不嗜殺人者能得天下而可與事君者實非鄙夫睠我元勳膺時碩望合太平之寰宇成一統之輿圖生為名臣歿有公論太傅右丞相巴延機沈而識遠量重而器宏十乘啟行共服征南之妙算七騶咸駕默傳濟北之遺編誓眾於鼓角之初過師於枕席之上具宣德意誕廣仁聲簞食壺漿之迎咸知己後觴酒豆肉之賜士向無前是謂制勝而屈人兵抑亦好生以全天道丞相之功第一智士之譽無雙方謙牧以學卑愈蒙養而用晦角巾私第恂恂似不能言雞翹屬車斷斷猗無他技肆予纘服躬任受遺功成莫居年運而往格于皇天者有儀

可象游於造物者不見而章師尚父之崇名貞惠文之美謚益疏王爵庸示國恩噫彝器景鐘足銘邦家之偉績蜜章祿典斯昭泉壤之幽光尚其明靈歆此殊命可

平章政事廉希憲母某氏贈國夫人

温璞出於玄圃貞松產於徂徠良由地氣之完以合天和之蘊故平章政事廉希憲母某氏柔嘉維則淑慎其思采蘋采藻之恪恭爲絺爲綌之素儉奉尊章於壯歲樂其天全率娣姒之諸郎視爲己出齊家以禮教嗣以忠用能爲先朝社稷之臣啓奔葉簪纓之慶雖爵從夫貴莫得而加然義以子賢當崇其本益開湯沐之侈庸增窀穸之光是爲異恩以旌舊德可

呼圖克台默色

松年案舊作忽答的迷失下同

公主追贈齊國大長公主

維王展親之道實先於惇敘粵昔慎終之典尤謹於追崇矧予同氣之賢是惟長主之貴廣疏異數庸寓至懷呼圖克台默色公主玉海澄輝金枝毓秀充然婦德成肅雖以爲穠李之華相其夫家閔勤勞而勸殷富之義婉順諧於日就

儉慈出於天然美王姬下諸侯固異公宮之制問我姑及伯姊益深先朝之思胡不百年以永終譽肺腑之託云在手足之念彌鍾圭觶荐更湯沐儼舊爰開名國下慰營魂噫立愛惟親曷愧死生之初志以義度德莫窮修短之大原沒而有知服之無斃可

宗正府寶哥贈祖父母

祖某特贈推誠保運翊亮功臣開府儀同三司太尉上柱國追封恆山郡王諡忠靖

風雲初際允資佐命之賢歲月既徂庸厚報功之典亶惟平治爰錫褒嘉具官某祖某貫日精忠凌雲節概載橐弓矢翊龍德於初潛以爲股肱展鷹揚而無敵噫孝文拊髀豈惟思古之名臣顯宗圖形實欲方今於前世九原可作千載如新可

祖母追封恆山郡王夫人

慎終追遠本先王之至仁崇德報功傳有國之令典具官某祖母某氏從夫早

貴訓子克賢如山如河之儀容宜室宜家之愷悌肇封大國儼焉象服之新益
慰九原歆此蜜章之寵可

參知政事賈某贈官

朕丕承大業遠究前圖肇邦九有之初紀綱備舉同德一心之彥贊畫允資慨
年運之云徂儼風猷而如昔具官某經術展緒孝廉起家侍幾微於帷幄之中
保身彌謹識變通於衡石之外得士尤多故一時出令之坦明皆先帝欲言之
旨意器能容物清不近名暨更南國之旬宣咸謂中朝之倚任方堅退佚益避
權姦活千人有封考於爾嗣德百世而祀論乃至公爰褒賢以勸功復易名而
疏爵噫方叔壯猶之雅雖已美於盛時韋丹遺愛之碑實有俟於今日皦如精
爽綏我寵光可

淮西道宣慰使劉復亨妻趙氏贈某國夫人

圖任舊人式表世臣之重烝昇祖妣用昭孝孫之賢維德厚者慶益長而爵貴
者報必遠具官劉無隱祖母趙氏鍾鼎望族山河令儀使節春行從子從夫之

樂備女箴夜誦爲母爲婦之道全頌臺之彥有嘉漏泉之恩采廣高堂素象音容猶想於含飴故里佳城湯沐儼疏於刻蜜湛然精爽歆此褒崇可

荆湖北道宣慰使劉澤妻孫氏贈某國夫人

孝治聿嚴誕布蓼蕭之澤聖謨丕顯遐思屈軼之賢念服瘁於外庸允資成於內助恩昭竝命光慰九泉具官劉無隱母孫氏里族高華閭儀淑慎閉戶而行盜饋曲盡婦儀暎雪以課詩書咸稱母訓梧捲之飲猶在茵鼎之養莫加位正小君已備沼繫之德爵崇大國益攄風木之思可

參知政事趙世延贈曾祖母 氏雲中郡夫人

積德在於百年實資內訓褒封及其三世亶謂異恩勤勞蓋臣服襲先矩具官趙世延曾祖母某氏幽蘭雅度喬木舊傳殷蠹雖閔其勤克彰忠節采繫不失其職允佐肅雝膏之沃者根必深種之豐者穡益厚顯于西土咸曰大家維爾曾孫益彰有慶於戲秩秩先廟崇松楸柏板之儀翼翼小君承錦誥金花之寵奉先追孝錫類與仁可

平章政事董某封贈三代九道

曾祖昕贈光祿大夫司徒趙國公諡宣懿

大裘無文可饗于帝良玉韞璞孰窺其珍灼知遺逸之民邁種渾圓之德克昌厥後不在其身具官董某曾祖具官某畎畝怡愉里閭退讓開田種尤深期蔽日之輪困如山出雲莫測爲霖之變化子能擇主孫亦象賢一門萬石之家聲四世五公之譜牒噫慎終追遠分茅宣曾矩之光崇德報功推本協孫枝之願亶惟異渥寵爾營魂可

曾祖母李氏追封趙國夫人

岷山之源若瓊而達于海至日之影如線而麗乎天信知明道不可以計功要在積微因之而成著具官董某曾祖母李氏盤阿共隱簪畝如賓惟耽積善之勤厥享降祥之驗百年未遠五世其昌噫象服表儀亦旣慰賢勞之願蜜章刻篆斯有昭孝治之隆可

祖俊贈翊運效節功臣太傅開府儀同三司上柱國追封壽國公諡忠

烈加贈推恩翊運效節功臣依前太傅開府儀同三司上柱國改封趙國公諡忠烈

駿命握乾誕啓中天之運豹韜宣武協成上國之光念風雲之會匪常而日月之流如駛爰新景命以慰故臣具官董某祖具官某被褐潛珍棄書學敵戎馬驅攘之未定志已出塵雲龍會合之有開獨能就日察敵保臨淵之智挽彊夸貫札之精釋兵爲農所活者衆延師教子其訓益深馬革裹屍深可憫生前之語虎頭食肉終有期身後之榮惟德之厚者嗣必昌而功之著者禮必報肆朕嗣服念爾疇庸爰廣重封以彰異數噫修祖廟陳宗器在于君臣之交修光王室逆天休惟爾子孫之無斃精爽不昧寵渥其承可

祖母李氏特贈壽國夫人改贈趙國夫人

殷雷勸義於昭媿德之賢柏舟作詩爰表自防之志雖內教止傳於閨闈而懿範備著于鄉閭具官某祖母李氏淑慎持家嚴勤訓子斥簪珥以奉賢師之饌化絲枲以助先祭之供衡宇周旋人不識其面目闔門款洽族猶想其儀刑雖

雙鯉之養弗居而入龍之譽罔替允惟賢母有光前聞茲予溥澤於世臣庸汝啓封於大國噫先正昭事已克光竹帛之傳夫人起家式敬承絲綸之訓用昭後嗣永肩一心可

父文炳特賜贈諡金紫光祿大夫平章政事忠獻公加贈宣忠佐運開濟功臣太尉開府儀同三司上柱國追封趙國公仍諡忠獻

君臣相資莫喻同心之美忠孝兩立斯爲佐命之殊念汗簡曷能旣其勳而朝著猶足以優其禮維祖有訓非朕敢私具官董某父具官某沈毅而善謀明恕而敦本黑頭試邑棄官羞墨綬之卑赤脚從軍絕食望翠華之幸刑輕典以安反側釋降人以靖流離白日揮戈睥睨益張其羽翼長風破浪蒙衝竟擣其腹心命在養民市不易肆取麥禾以陋鄭人之過收圖書以成蕭相之功嶺嶠宣威南人不復反矣朔方請使周公方且膺之恂恂持儒者之風諤諤挺大臣之節靖念不圖之建彌深喬木之恩格于皇天雖儼若帝庭之陟降渙其大號必有加玄宅之褻崇錫以嘉名胙之大國掌武襲建牙之舊開司增立戟之榮九

原如生終古永譽噫英才間出足爲邦家之立基盛德無瑕成爾子孫之逢吉
載加殊命以賁營魂可

母趙氏追封趙國夫人

鵲巢推夫人之德於配實難碩人歌衛侯之妻其賢可想具官某母趙氏秉心
淑靜主饋柔嘉逮事皇姑克奉甘旨於左右一視諸子莫窺憎愛之後先每傳
家訓之忠勞遂致孤兒之死事噫開脂田而獲上國夙謂無儔被象服以從先
塋幸哉有子可

繼母某氏追封趙國夫人

國族世貴鮮執禮以下人王臣功高適合符而媿德具官某繼母某氏敦厚天
性靜專內儀瞻彼南山深得勸夫之義遵于行潦不失奉祀之恭有子忠賢爲
我宰輔噫推恩三世庸疏湯沐之封錫類九原益廣蓼蕭之澤可

繼母王氏追封趙國夫人

嶰谷之竹應律而氣自鳴十洲之膠續絃而奇乃見不有佐餞曷能相夫具官

某繼母王氏組織婦工齊莊母道歲時盥饋立蘭玉以無譁春秋烝嘗絜牲醪而有度嗣子極中書之貴一門疏大國之封噫生也有涯莫稱魚軒之樂死如可作尚歆鸞誥之榮可

所生母樊氏追封趙國夫人

綵衣之養莫罄其私心板輿之歡遂以爲美事念風木之永感惜春草之寸暉具官董某所生母樊氏禮以母稱義由子貴勞謙終吉竟莫觀垂魚擁笏之榮一視同仁乃預享刻蜜演綸之寵允惟盛事服我異恩可

集賢大學士張晏贈二代四道

曾祖字贈保節功臣銀青榮祿大夫大司徒追封魏國公諡文愍

韋孟明經諸孫之傳始貴袁安卜葬三士之言若符膏之沃者日以光德之厚者世益遠具官某曾祖某進修家塾退靜鄉閭乾坤轉機後服先知之算干戈效勇舉宗成全歿之悲命也在天幸哉有子噫忠孝一門之盛事百世可知節義千古之大閑九原不作聿申景命庸建上公可

曾祖母常氏追封魏國夫人

盛德之報若券取償內訓之施如玉韞璞聿行尊祖之禮益知起家之難具官某曾祖母常氏澹靜無華儉勤有素清晨佐餽奉羔韭之肥甘晚歲謀生治蠶麻之靡密積善有慶沒世不忘噫魯孝孫之詩宜告成於先廟魏大名之國爰錫命於九原服我鴻恩亶惟異數可

祖英贈純德秉義功臣太保儀同三司柱國追封魏國公諡簡懿

幽蘭空林抱孤芬而永閔長松古澗垂巨蔭以自完明其道者不計功非其身者必在子具官張晏祖英德若不足樂且有儀遇真主之龍興出關而俟喜佳兒之豹變潛邸以從居官恥商權之謀接物多任俠之義念干戈首難彌深丘壘之恩歸鄉里自娛益廣子孫之澤考其篤素允謂安行噫于公之門少高茲言已驗畢萬之後必大今食其封爰詔後人益光前業可

祖母劉氏追封魏國夫人

德盛起家允著夫人之懿時危秉志有高列女之風蓋在昔以爲榮至于今而

彌顯具官某祖母劉氏澡身蘭服耽耳椿齡重闈期冢婦之興宗一札勸孤兒
之入侍忍乃有濟鑄金符緘口之銘安不忘危考室遜飛翬之制最德若是生
賢可知噫徂賚孝孫已極登瀛之貴逮事王母益疏分國之恩幽泉有知純嘏
無斃可

資德大夫江南諸道行御史臺中丞于璋贈推誠肅政功臣光祿大夫
平章政事上柱國追封薊國公諡文簡

善人天地之紀德莫有加君子邦家之基沒猶不朽睠懷遺直追錫殊封具官
于璋志蘊忠貞運逢熙洽慶雲甘露氣和而動植自宜威鳳祥麟瑞應而猛鷲
咸伏華要屢更於中外靖共彌保其始終緇衣不渝素絲靡替念在昔菁莪之
彥皆先朝棫樸之功年運旣徂風猷彌遠噫劉寬長厚允宜居鼎鼐之官胡廣
中庸謂當久臺閣之任事乖往古恩浹九原咨示營魂服我休命可

妻某氏追封薊國夫人

慎終追遠先王惇俗之盛心崇德報功治朝馭臣之大勸恩褒臺彥澤及閭儀

具官某妻某氏靜淑自脩柔嘉彌謹珩璜有節動常法於女箴圖史自娛身不
逾於內則傷哉無子貴也從夫脂田廣大國之封蜜印慰九京之望噫瑤琴別
鶴早已棄於人間寶劍化龍竟相從於泉下尙期冥漠歆此寵光可

茅山第一峯大茅君特加封東嶽上卿司命太元妙道沖虛聖祐真應
真君

靜慕玄風灼觀往事無爲曰道必刻意繕性而始成修身乃真非積行累功而
莫就大茅君奇操矯俗精思集虛壹德齋心受龜臺西華之祕旨萬靈受職開
金陵句曲之宗壇丹光千載以如新寶氣三峯而彌固發祥肇祉民至于今稱
之逆兩寧風天之所助順也亶惟作聖允合祐神孔蓋翠旌祀莫嚴於司命瓊
文蘂簡禮爰謹於秩宗假茲聰明佐予平治可

茅山第二峯二茅君特加封定錄右禁至道沖靜德祐妙應真君

合人心理萬物禮宜順於鬼神建皇極錫庶民徵有稽於暘雨大江以東之地
句曲維望而尊土樂昇平歲稱稔足二茅君中峯司命西華鍊形作牧審煩擾

一珍做宋版印
之非修真得恬淡之要驂鸞導從填籙儼奏於雲中化鶴來歸城郭時看於華表朕方推仁以濟衆靈宜妙物以祐民學道受之以神端有宗於李耳望祀不祈其福誠慕深於漢文嘉與函生誕敷景命可

茅山第三峯三茅君特加封三官保命微妙冲慧仁祐神應真君

氣化爲神握陰陽而執要物來能應遇水旱以成功茲山之靈以氏爲號三茅君不導引而壽體素純爲真密從蒼龍承左右而無間時乘白鶴侍伯仲以遠遊荷天降休爲民請命逍遙容與服光景以如新周流常羊蒙祉福而無極肆加褻錫不應隆平埋鼎高峯爰慕軒轅之有道獻金空谷方薄光武而不爲以赫厥靈同歸于治可

吳全節特進上卿玄教大宗師

運開至治法簡易以合泰玄教審宗傳隆繼承以明正嗣用揚渙號誕聳具瞻具官某孝友中乎準繩詞華鏗乎金石居無思行無慮粹然令名禮爲翼知爲時協于王度陟降紫宸而匪懈贊襄琳館而益謙藏珠在淵雲五色而川媚納

息于踵風八景以星從維列聖嚴珪幣之薦以格天而乃祖受劍印之錫而展
世四十餘年之帝顧卑已行權三千之徒首汝賢小心盡瘁俾超華貫爰倣舊
階侍清祠以表羣公度玉墀而膺六命祇若具訓允爲異恩噫奏陰陽之和以
祝釐則諸福可以畢至通神明之德以事上則庶績底於咸熙守慈儉以佐無
爲遵希夷而贊有道式觀素履庸佩綸言可

三十七代仙姑馮淑真特封靖明貞素夫人

紹玄風而展世丕闡帝猷溥內則以疏恩勉從人爵仙姑馮氏簪纓素緒鞏悅
芳儀媿穀城之傳益師清淨守柏舟之操采固堅貞受祉惟深錫名斯侈雲龍
風虎之慶會亶謂有光舞鳳迴鸞之制書懋承無斃可

昭應宮提點王氏金蓮特贈淵靜玄素真人

寂然不動知來去之有因湛焉長存宜死生之無間辭風雲之際會竟糠粃於
世塵爰加異恩以彰殊遇昭應宮提點住持王氏金蓮早塵椒掖晚謝藥宮修
崇密契於九重錫賚屢承於三接淨如止水斯爲至道之宗脫若太虛實本重

玄之體尙歆嘉號庸表將來可

長春宮提點常某授玄門演道大宗師掌教真人管領諸路道教所商
議集賢院道教事

治國以無爲惟宗式符要道順物乃自然之理允謂至言長春宮提點常某橐
籥重玄著龜萬變氣超渾沌灼知天地之根運際昇平默贊陰陽之化方獨立
以不改彌大盈而若冲爰紹真風以彰人望噫內觀形影斯泉石之素心外飭
身名實朝廷之異渥保茲清淨俾以闡揚可

昭瑞宮提點張惟一特授全德靖明弘道真人太一宮提點

神以知來至教匪存於象設人惟求舊褻封首錫於龍飛念扈蹕之宣勤默儲
祥而介福坤元具訓渙號揚綸昭瑞宮提點張惟一泉石古心冰霜雅操侍晨
長樂澹焉若樸而妙感彰澄觀穆清廓乎不驚而衆虛集惟才全者德不競而
正靖者明愈昭闡道王庭葆真冲館噫有國之母以長久爾尙謹於祝釐立天
之道曰陰陽當益思於觀復恭承嘉命助贊無爲可

廣誠靈妙演法真人江南諸路女冠諸宮觀都提點邵靈瑞特追封宗師

二儀之生根於太極萬物之母始於有名推剛柔迭用之原悟坤乾交泰之理茲焉觀妙足以表微具官邵靈瑞野鶴孤標金芝內行亶麻姑之清淑允謂地靈慕南岳之冲虛聿工草聖通章帝闕備問宮闈燁矣龍光守大盈而自牧端然蟬蛻享上壽而弗居道氣常新仙風不墜噫女偶朝徹已傳宗師之篇帝堯時雍爰有化人之國錫茲美號昭我鴻恩可

冲靖靈妙凝真法師玄元萬壽宮提點盧行益襲封真人

道要易爲功必假相傳之祕名盛難與繼益求自治之方矧茲女冠之慎修爰出朕綽以示勸具官盧行益冲澹若璞謹飭自繩侍藥珠之宮宣琳琅而不瀆守萼綠之訓視金玉以如遺惟清淨者玄學之宗惟簡素者師資之本斯焉無忝足以有承噫誦赤松中誠之經卑退爲德考南岳內傳之旨齋戒是先可

五雷宗師冲靖先生留用光特加封五雷宗師冲靖至德昭應真人

天地交泰而雷出奮風霆流形而物露生神行兩間因體而始有用數合五位由柔而後成剛乃知變動之機不出陰陽之妙五雷宗師留用光參合太始摩盪無垠學道從師懼厄窮而不悔救災禦患卒韜斂以如遺詢諸長老之言考以輿圖之載損之又損承禎之語若符生而不生介象之歸非異運隆累洽道慕重玄思其人如欲見之宜加綸誥告諸往而知來者益勵羽流可

通妙葆真先生高士易如剛特加封通妙葆真文教真人

式觀修真之徒多出好古之士伯陽柱下習典禮而道成弘景山中博載籍而書備高士易如剛學通羣藝妙集衆虛師清淨以避堂可謂簡矣問鬼神而前席殆將近之韋編之繼絕孰傳洞章之補亡猶在無文不立松風恍其步虛與時偕行草露晞而羽化方企崇玄之館爰思列仙之居本無名而各有庸彰往古效先覺者後覺庶勸將來可

臨江路閣阜山萬壽崇真宮住持四十六代傳籙嗣教宗師楊伯晉陞

加太玄崇德翊教真人

性出於無始存存爲成性之門道合於有爲生生乃得道之奧式觀載籍爰有
至人吐故納新以調其神齋心服形以制其炁于以濟衆因茲延齡具官楊伯
晉守樸丹丘潛珍珠館止息以踵陋熊經鳥申之迂藏珠于淵握龍變虎騰之
要開九籥之祕記傳八景之玄文問年今見其復丁會月密推其納甲天台之
召司馬損數術以理身羅浮之迎軒轅徹聲色而合德朕悉茲理卿無復言聿
加綽命之殊以重羽流之選噫居安易之序所當明天地之根修身德乃真宜
益究坎離之用贊敷皇極懋協鴻禧可

毛穎達封真人

主祭丁
甲神

道萬物之奧非虛不能以通微誠百行之源惟靜斯足以制動聿求佐理爰慕
希夷茲得有恆之人以贊無爲之化崇真宮提點毛穎達澄心止水植節貞松
禮爲翼知爲時澹然無競巧若拙辨若訥休乎有容藏名琳館之珍養粹玄門
之望維昔世祖動遵軒轅占瑤光以探五行之情通紫煙以嚴六子之用山林
蕭絜星斗爛明苟非其人靈弗顧矣不懈于位爾其勉之庸加綸誥之隆以示

真卿之貴噫乾元天下治也浚明用變之功神物聖人則之敬謹祝釐之效有嘉恬靖永保恪恭可

清容居士集卷第三十七

[Faint bleed-through text from the reverse side of the page, including characters like '真卿', '嘉祐', and '清容']

[Faint bleed-through text from the reverse side of the page, including characters like '清容居士集']

清容居士集卷第三十八

元袁桷撰

表
牋附

進五朝實錄表

皇祖有訓聿成四繫之書大曆無疆允纘五朝之治夙陳載筆上徹凝旒欽以
邦啓治平運符熙洽禮樂刑政教化之具炳若丹青典謨訓誥誓命之文昭如
日月維累聖繼承之述作實皇家混一之謀猷官謹具寮書嚴信史雖編摩之
匪一幸聞見之悉同欽惟陛下祇奉鴻圖光膺龍御惟天祐于一德咸曰湯孫
受命不若歷年悉循堯道仁宣孝治學廣文明臣某等職忝汗青官慚尸素帝
王之制可舉今已粹於鉅編詩書所稱何加願有光於億載

賀冊皇太子表

黼展當陽首重升儲之建彤庭叶吉誕承鏤冊之頒宗社以貞幅員胥賀

中賀

切以天下之本在國在家皇極之言是彝是訓然知子莫若父故立嫡必以賢

二美斯完羣情允屬信為非常之慶實開太平之基欽惟陛下駿命溥將燕謀
敷遺本支百世咸推受震之亨壽考萬年益著離明之象臣等濫叨膺任欣覩
上儀金石鏗鏘知協風之從律乾坤清晏瞻景耀之宣精

賀冊皇太子表

代宣徽院作

乾坤合德立鰲極以建中日月繼明奉龜圖而示吉誕敷渙號允迪震亨

中賀

欽惟陛下寶曆儲祥璿源衍慶立嫡以長遵三代有道之常受命於天膺萬年
永保之裕惟知子莫若父故治國先齊家上當帝心下定民志臣等恪共內府
欣際昌辰太極稱觴效驩呼而率舞寢門視膳嚴唯諾以致恭

賀正旦表

代宣徽院作

泰元衍策百二十日以為春乾御當陽於千萬年而受祜紫清叶奏丹陛傳臚

中賀

欽惟陛下盛德在躬至仁育物象闕而垂治法祖訓是繩獸樽以招直言

皇猷滋闡嗣歲蒼規之始羣生玉燭之和臣等班辨外朝職嚴內宰雲迴龍袞

肅瞻天日之光星拱鵷行虔祝岡陵之壽

賀武宗皇帝登極表

乘龍御天握純乾而居正斷鼈立極奠下土以宅中百辟一心四方胥賀

中賀

欽惟陛下聰明合道智勇冠倫承詔撫軍展素書之奇略登途受璽昭黃屋之珍符惟謳歌曆數之有歸繫祖考神祇之允格丕基永紹景命不移羣後以來蘇政與民而偕樂臣等班瞻文陛瑞仰層霄頒度量以朝諸侯三千同德垂衣裳而治天下億萬斯年

賀皇太后表

爲都省作

六飛夾日奉大曆於聖人五色補天歸玄功於文母事關宗社慶浹宮闈

中賀

欽惟陛下教闡周南德參太極以慈爲寶夙資保佑之勤維道積躬聿致怡愉之養顯坤元之光大卜鼎命之延洪臣等幸列周行欣承嘉會瑤池晝迴樂四表之驩心玉殿春迴衍東朝之曼壽

賀聖節表

本院

天開景運篤有道之曾孫電繞神樞受介福于王母觚棱瑞靄闔闔儀傳

中賀

欽惟陛下誕紹蘿圖丕承葆命至仁育物得秋而萬寶成盛德在躬居所而衆星拱當立經陳紀之始新省刑薄斂之規郊廟肇禋朝野胥慶臣等名汗玉署目極璇霄廣文王有聲之詩載歌律呂衍中宗無逸之壽虔祝華嵩

賀聖節表

代宗正府作

乾御當陽甫際中天之運斗樞繞電式臨彌月之祥絳闕青葱瑤京肅穆

中賀

欽惟陛下聰明合德孝友根心偃武修文百神歆而九廟格敦本崇化皇極建而庶績熙爰開有道之長斯衍無疆之慶臣等職縻邦憲身阻廷趨有王者興行見溫洛榮光之瑞祝聖人壽願增泰元神筴之書

賀皇太后冊寶禮成表

本院

蘿圖衍瑞丕昭景命之祥寶冊騰徽誕紀慈元之懿聖心祇恪子道昭揚

中賀

欽惟陛下稽古聰明事親愛敬有國之母以長久致養聿嚴天道之要在陰陽飭躬彌謹禮行中禁慶洽九圍臣等職近鰲頭班聯龍尾玉卮前壽肅瞻長樂之儀彤筆特書願廣思齊之聖

賀皇太后冊寶禮成表

代宗正府作

黃鐘應律協陽德之初亨寶冊告廷奉坤元之至養尊歸慈極慶洽治朝中賀
欽惟陛下愛敬積衷順承法道雍雍肅肅聖實本於大任怡怡愉愉孝有光於
唐帝日嚴初政風動八方臣等恪謹國章欣陪班著瑤池晝迴幸預聞管籥之
音玉學春融願虔祝岡陵之壽

賀皇太后冊寶禮成表

爲都省作

乾旋坤轉定妙算於宮闈月吉辰良鏤徽音於典冊東朝禮著九寓歡騰中賀
欽惟陛下聖嗣大任道希少廣以天下母游神清淨之居惟泰元尊致謹怡愉
之養允持慈寶益屆壽祺臣等會弁鸞聯趨庭鼇抃陽回玉琯八音首協于黃
鐘春滿瑤卮萬歲齊呼於紫禁

賀聖節表

寶曆建元協重華之嘉運瑤光貫月開上聖之貞符盛德在秋昊天有命中賀
欽惟陛下智仁御極孝友根心丕顯王謨端拱巖廊之上達觀新邑式均道里

之中取泰象於坤乾合離明之日月璇璣叶紀玉斗儲祥臣等祇率班聯肅瞻清穆宣昭鴻業載歌七月之詩耆定武功願繼萬年之雅

史局謝錫宴表

立朝載筆交懷惕日之慚就館肆筵申錫需雲之寵恩傳宮醴光動廷紳

中賀

欽惟陛下黼黻先猷憲章祖武謂丹青信史紀二聖之鴻文念鉛槧微勞屬小人而燕賚魚藻歌騰於周室鳳簫聲遠於鈞天屆視朔以迎長粲飛翼而奏瑞上追稿飫下陋權輿臣等愧匪食功懽惟飽德陽剛初復太平歌既醉之詩天威不遠下拜祝無疆之壽

賀正旦表

爲都省作

會謹天朝文命敷于四海曆司人統攝提正於孟陬率由舊章曰爲改歲

中賀

欽惟陛下道裁天地政在璇璣崇鄉黨以厲賢才聿嚴親策詔郡國而謹牧養爰廣使軺東漸西被以如春小往大來而交泰禮行雅壽捧瑤斝於東朝親納直言開獸尊於前殿亶惟平治允際亨嘉臣等祇率鸞行肅登龍尾弘敷五典

慚退食以罔功永保萬年敢矢心而善頌

賀正旦表

本院

清臺課曆允符顓頊之元明堂視朝茂正攝提之位陽迴象魏儀贊鴻臚

中賀

欽惟陛下經緯人文財成天地審賢良知古今之體能勵廉隅謂吏道以法令爲師益嚴品節剛健密參於太極怡愉深謹於東朝車駕蒼龍導迎木德樽開白獸詢採芻言臣等材乏頌椒恩叨給札春王正月推五始之大原天子萬年納八荒於壽域

賀皇太后正旦表

歲在攝提叶孟陬之令月曆符顓頊開太始之上元時屆履端天綏眉壽

中賀

欽惟陛下清心慈儉至養怡愉數往知來利永貞而坤厚體中居順祉元吉以泰亨徽音惟日以恆新懿德如春而益暢臣等職叨視草才乏頌椒絳闕五雲王母隴臨於黼座玉卮萬壽神堯親捧於瑤階

全德泰寧福慶皇太后尊號冊寶禮成賀皇帝表

爲都省作

皇矣上帝丕昭立極之功至哉坤元申衍得名之典禮行宮壺化被寰區

中賀

欽惟陛下敬養日嚴文明天縱謂聖德無加於孝爰盡討論而天子必有所尊
載揚徽美御未央而登冊卽長樂以展儀鳳泊鸞飄寶刻永光於秦璽雲蒸霧
起翠華親下於堯階協氣醇和嘉生博厚臣等班聯會弁壽介奉觴太微三光
之庭烟煴交泰有名萬物之母允合永貞

賀皇太后正旦表

丁巳爲
都省作

正月始和資坤元而蕃衍兩儀交泰綏壽祉以亨嘉德協青煒瑞浮紫禁

中賀

欽惟陛下寶慈作則履順行仁龍袞捧觴喜溢椒花之頌龜臺簇仗坐觀蓂莢
之祥審孫枝之正傳定國本以蚤建邦家大慶朝野均懽臣某等祇率鸞行式
遵鳳曆正時成歲百廿日以爲春利用厚生萬億年而受祜

賀皇太后正旦表

集賢
院

禕衣視旦丕彰立極之功鳳歷頒春誕合建邦之歲笙鏞翕繹黼黻昭明

中賀

欽惟陛下道協母儀教參女史承顏致養順德備於九重正位在中行願符於

六五朝贊聖神之治禁傳慈儉之謨臣等叨侍近班肅瞻嘉會玉卮爲壽儼寶殿以雲從金篋賜齡樂瑤池而晝燕

賀冊皇太子表

集賢院

前星定位仰宸極之聖謨陽月臨軒法坤元之慈訓光騰鏤冊儀謹傳臚

中賀

欽惟陛下稽古行仁憲天合道知子莫若父審恭敬之積中治國先齊家盡怡愉而致養惟宗祊繼體之事大玩易爻重明之象深著龜協祥乇鬯承嫡臣等職糜珍館班肅彤庭喜溢龍顏虎拜咸呼於萬歲禮嚴鶴駕鸞和共徯於三朝

冊皇太子賀皇太后表

集賢院

承天正位詒謀啓於重闈諏日揚廷渙號昭於寶冊大明繼照萬邦以貞

中賀

欽惟陛下色石功深黃裳德順以似以續降葆命以丕基是訓是行席蘿圖而端本知立嗣必子之有自審建儲非私之惟公施于神孫繫我文母臣等職塵清貫班肅上儀簫韶九成願盡稱觴之慶本支百世式瞻主鬯之尊

皇太子兼中書令賀表

代宗正府作

黼辰當陽懋對紫宸之慶玄龜叶吉丕昭寶冊之光八音播廷羣公會弁中賀

欽惟陛下悅親有道立賢無方謂一人元良勢實尊於藩翰而中書政本命尤

慎於樞機孝友宣昭仁慈溥博臣等恪司成憲欣覩縟儀卜七百年願衍周家

之曆上千萬壽咸趨漢殿之班

賀正旦表集賢院

丹辰當陽頒發春之仁政清臺治曆符建國之昌期日之方中天其申命中賀

欽惟陛下澤漸滲漉心玩神明盤銘監觀德又新而無斃河圖則象祉元吉之

有恆獸樽設席以招言龍袞坐朝而問道臣等瀛洲布武闔闔詔儀玉燭豐穰

用制九年之蓄紫清蠖獲業隆萬世之基

賀皇太后正旦表丙辰為都省作

歲指蒼龍密叶昭華之瑄雲開禴翟首稱長樂之觴順履始和懋隆元吉中賀

欽惟陛下儉慈作則清淨頤神色石功深妙裁成而交泰黃裳位正盡滲漉以

皆春母儀循四序之周聖孝衍三朝之社臣等職叨輔相效愧燮調拜捧椒花

慶載臨於元日宴觀桃實祈永保於萬年

賀正旦表

壬戌本院是歲閏五月

肇祚發春仰正陽之布治歸餘成歲審長至以觀生黼辰昭明彤庭肅穆
欽惟陛下仁推滲漉道協際蟠修德錫符驗陰陽之消長發號出令則天地以
裁成念不圖演繼于祖宗究盛禮益嚴于上下臣等瀛洲接武文石趨班閏月
定時泰治密齊於七政皇極錫福北元永保於萬年

賀太皇太后正旦表

地天交泰陰教法乎坤元閏餘歸終寶曆增于夏五陽浮中禁瑞藹重闈
欽惟陛下端懿母儀慈明內範怡神少廣悟黃中通理之爻辨秩東郊樂青煒
登平之景曰惟肇歲茲用儲祥臣等給札承恩肅班稱慶筆徽音於彤管歲不
絕書望長樂之璇宮天惟曼壽

進仁宗皇帝實錄表

君臨十載式昭垂世之謨聖治萬方庸謹繫年之錄編摩玩愒敷奏凌兢欽以

仁宗皇帝陛下濬哲積躬欽明稽古發揚乾健預清宮以候先皇祇奉坤元虔
問寢而娛太母審俗周知於民瘼授時彌切於歲豐謂養性存心宜採於傳記
而脩身治國必取於禮經監觀歷代之著龜夷攷前王之軌範政要採諍臣之
讜議大學芟衍義之浮辭爰譯成書用裨博覽至若譽髦斯士擢不次以待非
常爵人於朝表有功而抑妄進每遵帝範肇立儒科廣祖宗百年未備之規示
子孫億代永貽之訓珠玉非寶旁招菁莪之賢農桑惟勤旋致嘉禾之瑞惡衣
服以申緣履之禁省畋獵以彰開網之仁增胄子之官資限計吏之品級爲民
請命匪營一己之福田遇裁秉誠果應自天之甘澤與人不求備從諫如轉圜
河徙故灘謫斂臣於嶺徼雪深前殿憫戍卒於邊防常思創業之艱益慎守成
之效道傳精一明授受之至公孝竭怡愉協繼承而無間凡茲殊美冠乎羣倫
濡毫惟懼於荒蕪削牘復虞於缺軼雖盡巧心於舉要蔑窮茂績之勛功欽惟
陛下葆命誕膺鴻圖丕顯窮神知化彰明聖之鋪張詢事考言採臣鄰之記注
屢宣睿旨迄萃鉅編雖天地之德無俟於贊揚而日月之光有資於繪畫臣等

職叨率屬識乏簡僚慕永貞之謹嚴詞慚韓愈稽太初之直核筆愧馬遷

舊制進實錄表文有短長然未敢以數聯直致伏觀聖朝二帝實錄進表必加詳盡摘其所行事跡以序篇首楠大德中嘗進五朝實錄表未免倣效前作今輒不揆遵守舊制撰成一

又

十年御極聿脩四繫之編億載揚休殊乏三長之筆祇成信史上徹宸旒 中賀

欽以仁宗皇帝陛下仁靜根心温恭合德詩書造士闡學制以設科法律為師嚴官規而限祿諏經作則稽古鑒今所寶惟賢卻獻琛而弗尚莫大於孝謹視膳以彌加著龜定主鬯之公棫樸藹奉璋之衆宜登琬刻永祕縑緗欽惟皇帝陛下慕切羹牆令行金石率時昭考撫言行以無遺迪惟前人繼聖明而有造臣等尊聞傳信竭思纂題閱歷歲年已深慚於尸素經緯日月期不朽於汗青

賀正旦表 癸亥篇都省作

歲正天門陳揆治朝之位曆新人統肅嚴魏闕之班四表迎祥八風順律 中賀

欽惟陛下仁施滲漉命受溥將輔相財成別忠邪而無黨斟酌損益合禮樂以

同流圭璋藹多士之良玉燭北大田之慶準繩乾健橐籥泰亨臣等補袞功慚
更弦政拙萬年永錫仰瞻太極之尊六甲既周行履上元之運

賀聖節表

癸亥爲
都省作

十月爲陽於赫發祥之兆一人有慶丕昭嗣服之初出日之升降年以永

中賀

欽惟陛下斂時錫福握乾闥珍玩天地之心陽初升而來復發雷霆之令陰早
辨於履霜繩祖武以雍熙格民風而醇厚道尊泰壹運接上元臣等叨列近司
欣逢盛旦望翠華之行御瑞藹五雲趨絳闕以傳臚齊呼萬歲

牋

賀皇太子受冊牋

爲都
省作

禮嚴中禁位建承華萬國以貞咸曰吾君之子四方來賀永底烝民之生 中賀
敬惟殿下玉璞蘊珍金枝表秀繼體而承七鬯如歲之春定志以協著龜維天
其祐方謹雞鳴之問聿新鶴禁之居某等叨列政司欣傳制命父子君臣之道
備允廣緝熙詩書禮樂之教崇式符繼照

賀皇太子受冊牋

代宣徽院作

範金作寶禮成內朝簇仗演綸驪騰四字協春秋之大義覃雨露之殊恩

中賀

敬惟殿下岐嶷天成溫文夙就佩規帶矩正言正事之教成執玉奉盈事父事君之道備某等叨司庶府欣覩盛儀仰黃道之日長式符離照候明堂之星潤
允謂震亨

賀皇太子受冊牋

本院

體元更始肅瞻玉裕之姿崇德計勳肇錫朱明之服宗支襲慶國本奠安

中賀

敬惟殿下英睿夙成藝文天縱清宮朝邸朱虛之功爲高審俗迎郊孟侯之賢
允似受介福于王母繼明照於四方維軍國之樞機實政化之橐籥名倡百辟
兩儀正而五緯齊德和萬邦九穀熟而三農足某等職叨掌綽欣覩揚庭紀王
子之吹笙有慚斧藻歌堯民之擊壤願廣丹青

賀皇太子受冊牋

代宗正府作

盛德動天誕受元良之冊萬邦爲憲悉資文武之賢政本增崇皇基鞏固

中賀

敬惟殿下圭璋王度黼黻聖謨整齊乾坤指揮於旋轉之頃肅清宮廟怡愉於定省之間亶惟不世之勳庸舉非常之典某等職司宗籍欣覩王綸磐石既安願上則百斯男之頌權衡允稱克成曰三有俊之功

賀皇太子正旦代牋為都省作

曆起上辛啓自天之申命歲行維戊瞻出日之重光萬宇薰陶九垓滲漑中賀

敬惟殿下功調玉燭政察璇璣宴錫龜臺密承歡於王母仗移鶴禁親奉壽於神堯維春之祺有秩斯祐某等導迎嘉節贊詠清時候銅瑄之陽和式占泰定望青宮之葱鬱允協震亨

賀千秋節代牋太保府作

月映彩雲慶仰猗蘭之瑞令行青陸書占玄胤之祥維春之祺粵上斯已中賀

敬惟殿下宅心聖學匡力皇圖廣邦家太平之基澤窮滲漑察天人同心之理下逮芻蕘仁孝合名中和叶德某等展儀穀旦俛首叢霄壽考萬年敢陋千秋之頌本支百世願陳大雅之詩

賀千秋節牋

代詹事院作

甲觀畫堂仰紀吹銅之瑞瑤山玉彩特書主鬯之勳維莫之春初吉云已 中賀
敬惟殿下蒼規體德銀漢儲祥稽七政之有恆實循冬夏消羣陰於交泰爰法
坤乾興鴻文以闡基握龍圖而佐運兩宮定省雍容化日之長四表謳歌瞻俛
前星之耀某等具寮無補盛旦有光奉曲水之羽觴齊呼曼壽探泰元之神策
允謂延洪

賀皇太子正旦牋

本院

青規紀曆甫開嗣歲之祥蒼震布和懋協少陽之象自天申祐與物為春 中賀
敬惟殿下經緯人文權輿政治三朝交泰聿嚴盛禮以奉觴四德尊乾行美成
功而瑑玉卜稔已符於祈穀登賢深味於拔茅慶洽宮闈仁施寓縣某等叨塵
顧問欣覩亨嘉聲徹鳳笙仰非霧非煙之瑞班隨鶴駕歌重暉重潤之詩

賀皇太子正旦牋

為都省作

歲正璿璣不應震亨之象春先寶曆允符泰治之祥絳闕光華青宮葱鬱 中賀

敬惟殿下道隨陽長德與日新玩易中行密包荒而塊圮法天繼照永主器以
彌綸稱觴前殿以承顏侍宴瑤池而受福某等禮成鶴禁敬謹鳧趨祈穀躬耕
預卜金穰之兆頌椒介壽欣瞻玉裕之姿

賀皇太子受冊牋

集賢院

明堂辨儀袞對重輝之耀昕朝發冊丕昭上嗣之賢宗社枝寧幅員驩慶
敬惟殿下孝仁生稟禮樂夙脩一人元良羽翼靡煩於商皓百揆時序英威共
仰於秦王鶴駕之御日三烏輪之光明兩某等叨塵仙館末綴臚庭瀛水汪洋
望瑤山而親切宸居蠖濩瞻青路以陪從

賀皇太子正旦牋

集賢院

大曆更新叶皇祖建元之祚少陽正位隆神孫承嫡之基百辟是儀五辰攸敘

中賀

敬惟殿下應乾作命受震行仁嘉禮告成歸妹祉吉之象外朝佐治同人

文明之祥日就月將而緝熙小往大來而分類某等肅瞻玉裕謹候青燁詠歌
重光紹天休而繼照弼諧庶績占歲在之有年

賀千秋節牋國恤未餘月百司皆擬賀表非禮後不進

電繞斗樞允昭甲觀之瑞日昇暘谷行受明堂之朝宗社底寧神祇協相中賀

敬惟殿下欽文師古剛健法天或躍在淵龍德合乎中正永言配命龜圖闡其
延長仰震夙之非常審傳付之素定某等肅瞻晬表獲際重光聖孝有加羹牆
之慕彌切民情共戴岡陵之祝益虔

賀千秋節牋本院

心居天位前星耀於明堂卯爲春門大電騰于甲觀盛德集福至和儲祥中賀

敬惟殿下體仁法元師古合道溫恭事帝密贊化以生成問學積躬益緝熙而
光大疇選黃髮之彥庸佐青闈之規如日之升降年有永某等肅瞻英偉虔祝
簡穰輯往則於瑤山一辭莫措採賜齡之金篋曼壽是期

賀千秋節牋爲都省作

玄馭發祥不顯吹銅之瑞蒼龍協紀式昭主器之符紫禁懽騰璿源秀衍中賀

敬惟殿下溫文秉度仁孝積躬侍宴瑤池令德令儀之可述問安內寢正言正

事之足聞如歲之春自天其祐某等導迎穰簡贊詠中和瞻出日之舒遲重光
允繼望彩雲之葱鬱曼壽是期

賀皇后正旦牋

本院

王春謹時肇正內朝之治帝曆更始益嚴中禁之儀與物咸亨自天作合
中賀
敬惟殿下矩循內則言法徽音關雎詠歌禮避乎蘭殿之貴卷耳思念頌取于
椒盤之文稽陽德維如歲之初考陰教曰履端于始某等清班接武穀旦趨朝
日月並明願上千萬之雅壽天地交泰載歌元二之太平

清容居士集卷第三十八